

Das Ratsarchiv zu Borna (bis 1600)

II. Abteilung: Urkunden

von Oberlehrer Dr. Wenck.

In nachstehende, chronologisch geordnete Sammlung der im hiesigen Ratsarchiv befindlichen Urkunden, welche ich zu meiner vorjährigen Arbeit benutzt habe, sind auch die an verschiedenen Stellen vorhandenen Kopien älterer Urkunden aufgenommen und mit * bezeichnet, dagegen weggelassen einmal die dasselbe Besitztum betreffenden späteren Lehnbriefe, sowie andererseits die in allzu umfangreicher Weise ergangenen gerichtlichen Entscheidungen namentlich in Bierprozessen, da dieselben aus dem Bereiche der Urkunden im engeren Sinne herausfallen und eher als Aktenstücke zu bezeichnen sind.

An der Orthographie irgendwelche modernisierende Aenderungen vorzunehmen, habe ich mich nicht entschliessen können.

* 1327.

Friedrich schenkt das Patronat in Borna an Kloster Pegau. Abschriftlich im Probsteibuche und mit kleinen Abweichungen im G. K. Gedruckt bei Schöttgen, Historie Wiprechts zu Grotzsch; codex probat. nr. XVIII.

[1.] In nomine domini Amen. Gloriosus deus in sublimitate¹⁾ cuius providentia in sua dispositione non fallitur;²⁾ Etsi suis fidelibus ad se veniendi multifarias virtutum vias scripturarum alloquiis misericorditer decreverit³⁾ demonstrari: inter omnes tamen ad sui divini cultus ampliacionem et in eodem religiosa et exemplari vita militantium affective conservationem quemlibet⁴⁾ pro sibi concessarum facultatum⁵⁾ modulo pro attingendo quod ipse est optato bravio voluit indulgentius insudare, Et licet cunctis eius ministris satisfaciat opulenter, quos tamen ingentior meritorum commendat excellentia uberiore retributione plus respicit affluenter: Nos igitur fridericus dei gratia Thuringiae Landgravius misnensis et orientalis marchio dominusque terrae Pl(e)isnensis tenore praesentium publice recognoscimus volentes ut tam praesentis aetatis maturitas quam futurae successionis prosperitas maxime autem quorum interest seu interesse poterit Cuiuscunque conditionis vel status existat hominum non ignoret quod huius modi promissis ducti salutiferis monitis et exemplis factisque⁶⁾ quondam solitis et piis Illustrissimorum⁷⁾ dominorum et celeberrimae memoriae progenitorum nostrorum inhaerentes vestigiis ipsum regem regum et intemeratam virginem omniumque sanctorum coetum⁸⁾ in hac parte primordially venerantes tandem devotis instantiis honorabilis viri Abbatis Abbatiae Piigaviensis

¹⁾ G.-K. et sublimis. ²⁾ G.-K. semper infallibilis. ³⁾ G.-K. decrevit. ⁴⁾ G.-K. quaelibet. ⁵⁾ G.-K. concessis facultatibus. ⁶⁾ G.-K. carisque. ⁷⁾ G.-K. domini. ⁸⁾ S. coelum.

nostrae curiae cancellarii et rectoris praecipue nobis synceriter et intime dilecti ipsius benefidelitibus et meritis exigentibus favorabiliter inclinati Ecclesiam par(r)ochialem in oppido seu civitate nostra Bornis et jus patronatus eiusdem: quod quidem ad nos de antiquis approbatis et retro actis temporibus pacifice observatis iure et consuetudine ex devolutione hereditaria hactenus pertinuit cum suis capellis et altaribus nec non et locis omnibus cultis et incultis quibuscumque censentur nominibus ac etiam juribus¹⁾ et jurisdictionibus universis ad eandem ecclesiam pertinentibus eidemque domino abbati et cuilibet successorum suorum suo conventu(i) nunc existenti et in futuro²⁾ sequaci monasterio ipsius ibidem piigaviae patronatu eiusdem praedictae virginis Mariae sanctique Jacobi apostoli gaudentes donavimus tradidimus anneximus univimus appropriavimus et quantum cunq̄ue nostra interest incorporavimus et praesentibus donamus tradimus annectimus unimus appropriamus et incorporamus canonice legitime et in toto perpetuis temporibus impedimentis abs quibus libet libere³⁾ possideat Resignantes nihilominus eisdem praesentibus manu et ore et calamo ac resignatione legitima ipsum ius patronatus dictae ecclesiae cum omnibus bonis et juribus quibus supra ac etiam idem⁴⁾ jus in dictum dominum abbatem quemlibet successorum suorum ipsius conventus sequaces dictumque monasterium suum in pegavia sicut retractim fluxu temporis possidemus hoc simpliciter transferentes Ipsos quoque videlicet abbatem conventum monasterium praedictum simul et semel dictae ecclesiae iure patronatus eiusque bonis et juribus omnibus et singulis [juris]⁵⁾ et consuetudinibus⁶⁾ investientes et in corporalem possessionem prout ad nos pertinet ipsius ecclesiae patronatus bonorum ac jurium eiusdem mittentes adhibitis solennitatibus debitis et consuetis Renuntiantes omnino et absque dolo universis ac singulis allegationibus cautelis vivis et punctis utriusque juris nobis seu nostris successoribus quoad praemissa videlicet ecclesiae patronatus bonorum jurium eiusdem futuram impetitionem: quod tamen absit: petentibus in posterum competere et nulla tenus suffragari nihilque nobis⁷⁾ incertis nostris successoribus in huiusmodi praemissis penitus iuris fruitione⁸⁾ etc. de facto in antea et usque in perpetuum reservantes Praeterea (et) ut divinus cultus in dicta ecclesia latius de cetero extendatur annuimus et indulgemus dictis videlicet abbati et conventui quatenus ibidem dedicare et plantare valeant, prepositum instituendo locando inibi canonice de suo ordine quotquot duxerint personas idoneas et disponendo quoad talia iuxta quod eisdem visum fuerit secundum qualitatem status et temporis melius et congruentius expedire Renovantes iusuper et meliorantes ampliantes (et) confirmantes matura deliberatione praevia simul et ratificantes principalium literarum patrocinio omnia et singula praemissa omnesque devotiones appropriationes libertates exemptiones immunitates et gratias⁹⁾ quascunq̄ue item¹⁰⁾ (quippe) et omnia singula privilegia ipsis per nostros praedecessores per nos seu alios quospiam nostrae ditioni subiectos indultas vel indulta omnesque differentias¹¹⁾ eorundem privilegiorum et suspensiones si quos vel quas fortassis quacunq̄ue de causa vel occasione peterent¹²⁾ ex nunc etiam praesentibus tollentes totaliter suspendentes¹³⁾ et simpliciter abolentes¹⁴⁾ Ut autem haec omnia et singula praemissa inconcussa et inconvulsum robur obtineant perpetuae firmitatis et per nullius temerariam audaciam queant infringi¹⁵⁾ praesentes literas super his¹⁶⁾ editas et confectas dictis videlicet abbati et conventui et monasterio Pygaviae dedimus in perennis testimonii evidentiam nostri sigilli maioris et autentici appensionis munimine roborantes Cuius rei etiam testes sunt venerandi in Christo patres¹⁷⁾ et domini videlicet dominus Henricus ecclesiae Numbergensis episcopus¹⁸⁾ item Nobiles viri Guntherus comes de Schwarzburgk senior Henricus comes de Schwarzburgk item fideles nostri Joannes Magnus¹⁹⁾ de Schwizin senior Henricus de Königsfeld[t] Otto de Vanre²⁰⁾ Camerarius Fridericus de Spangenheim²¹⁾ Otto de Kottewitz noster Marschalgus petrus dictus portzick Bartoldus de Nezekreide²²⁾ Kunemundus de Schottenheim Fridericus de Heimburgk et quam plures alii fide digni datum Anno domini MCCCXXVII.

¹⁾ juris. ²⁾ S. futurum. ³⁾ Pr. litterae. ⁴⁾ Pr. eidem. ⁵⁾ fehlt bei S. ⁶⁾ G.-K. consuetudinis. ⁷⁾ S. vel ceteris. ⁸⁾ G.-K. fruitionis aut potestatis etiam. ⁹⁾ S. gratias. ¹⁰⁾ S. itemque et. ¹¹⁾ G.-K. deferens. ¹²⁾ G.-K. paterentur. ¹³⁾ G.-K. suppletes. ¹⁴⁾ G.-K. abducentes. ¹⁵⁾ G.-K. . . . vel infirmari. ¹⁶⁾ G.-K. has. ¹⁷⁾ S. pater. ¹⁸⁾ et dominus Wilago ecclesiae Mersburgen. episcopus. ¹⁹⁾ fehlt G.-K. ²⁰⁾ S. Vaure. ²¹⁾ S. Wangenheim. ²²⁾ S. Nezenreide.

* 1332.

Abläss in der Georgenkapelle. Aus Stadtb. pag. 93 a.

[2.] Lodewicus dei gratia Brandenburgensis ecclesiae episcopus universis Christi fidelibus ad quos praesentes pervenerint salutem in omnium salvatore. Cupientes populum domini ad solum devotionum et ad opera caritatis indulgentius incitare Omnibus igitur vere penitentibus qui hospitali sancti Georgii martyris prope opidum Bornis Merseburgensis diocesis elemosinas in caritate dederint, seu ecclesiam sancti georgii causa devotionis accesserint de misericordia omnipotentis dei et beatorum apostolorum Petri et Pauli meritis confisi XL dies indulgentiarum ac carena de iniuncta sibi pina dummodo dyocesani consensus accesserit in domino misericorditer relaxamus. datum Merseburg anno domini M^oCCC^oXXXII^o in die Bartholomei apostoli.

* 1354.

Abläss in der Georgenkapelle; Stadtbuch pag. 93 a.

[3.] Nos frater rudulfus dei et apostolicae sedis gratia Constantionensis episcopus ac venerabilis in christo patris domini hemo [?] merseburgensis episcopi in pontificalibus vicarius universis hanc literam inspecturis salutem in domino sempiternam. Cupientes ut capella hospitalis sancti georgii in bornis congruis honoribus frequentaretur¹⁾ omnibus vere penitentibus contritis et confessis qui ad dictam capellam sancti georgii causa devotionis accesserint in festinatibus infra scriptis videlicet nativitate Christi, pasche, pentecost. ac corporis christi, nec non in omnibus festis beatae mariae virginis, nec non omnium apostolorum ac patronorum ecclesiae eiusdem, aut qui suas manus porrexerint adiutrices nos de omnipotentis dei misericordia ac beatorum apostolorum petri et pauli gratia confisi XL dies indulgentiarum ac unam carenam de iniunctis sibi penitentiis misericorditer in domino relaxamus in cuius concessionis testimonium sigillum nostrum duximus praesentibus appendendum datum anno domini M^oCCC^oLIII^o in translatione sancti Benedicti.

* 1381.

Altarweihe in der Georgenkapelle. Stadtb., pag. 93 a.

[4.] Anno domini M^oCCC^oLXXXI^o Reverendus pater albertus Episcopus Ebrunensis ordinis minorum Istud altare consecravit in die sancti Martini Episcopi In honore[re] beati georgii martyris, et in honore beati andree apostoli et in honore beate barbare virginis et in honore beate Elizabeth et beatorum martyrum fabiani et Sebastiani et Idem episcopus instituit dedicationem altaris dominica proxima post festum sancti Martini.

1397. ²⁾

[5.] In nomine Domini amen. Wir Cunrat von gotis gnaden vnd dez Römischen stules Apt. Johannes prior. petrus sangmeister. heinrich custos vnd die ganzee samenunge gemeyne dez gotishufses czu pygow. Wir bekennen öffentlichin in desim keinwertigin briffe allen den dy yn sehen hören ader lefsen. daz wir haben angesehen dy ynnikeit Nickel Stidicz bürgers czu Borne vnsers gotishufses erbman. vnd helenen syner Elichen wirtin. vnd habin yn durch yrre bete willen dy gunst mit gutin willen vnd mit Rate vnsers Egenanten Capitels des vor genanten gotishufses czu pigaw. eynen altar czu stiftynne in vnfs kirchin der probistige czu Borne in der eren vnfs liben frowen also man den nennet in dem Latine visitationis dar czu geschicket vnd gegeben habin der vorgenante Stidicz vnd syne wyrtnne stifftere dez altares hundert schog. Ouch haben andre gute lute dar czu gegeben daz man hat geczuget Syben marg geldes eyne vnfs herren vz vnserm Closter der den altar belefsen sal. vnd dem probiste eyne marg geldes ab vm(?) dar von icht mochte abe gegen. mer habe wir gunst getan daz der Egenante nickel Stidicz vnd helena

¹⁾ frequentares.

²⁾ Diese älteste Originalurkunde befand sich im vorigen Jahre in Dresden, da auf Grund des ihr anhängenden ältesten Stadtsiegels das Stadtwappen geändert wurde. Mir kam sie erst vor wenig Wochen zu Gesicht.

syner elichin wirtin vor wen sy beten vnser herren eyn der nicht eyn Anrecht an vm hat dem wolle wir vnd sollen den altar bevelen, vnd nach komelinge nach vns nach der vorgeanten beider tode Stidicz vnd synes wibes so sal dy bete der stat syn czu Borne vnd dez Rates der stat. glicher wis also Stidicz dy gehabt hat mit allen rechten vnd eren. Were ouch daz der. der den altar belefsen sal anders hilde den der Orden uzwiste den scholde man her abe nemen. So scholden dy megenanten einen andern kysen. Ouch ist gered daz der altar belefser sal da sin ane des probistes schaden also waz vm gepphert wert daz her daz dem probiste sal geben darff ouch eyn probist czu notin eyner messe czu singinde dy sal der vorgeante altar belefser singen über dem eygen altar. Ouch schal der vorgeante altar belefser mit dem probiste czu kösten gen ader wi ym daz fugit. ader ebent. Waz ym ouch bescheiden wirt da sal ein probist nicht yn reden. Wirt ouch icht bescheiden czu dem altar daz sal dy stat vnd der altar beleser wenden vnd legen an nucz des altars. Ouch sal der altar belefser alle jar stidicze vnd syn wip vnd alle ir geslechte begen vff den mantag nach quasi modo geniti mit vigilien vnd sele messen czu deser vorgeanten ewigen messe hat Stidicz vnd syn wip gegeben hundert schog. Wen vme dy summe geldes vnser vnd vnser capitels wissen gekoufft wert acht marg geldes vnd geeeygent dy sal man wisen an den vorgeanten belefser des altars vnd an den probist, daz alle dese vor geschreben rede. stucke vnd artickel stete vnd ganz gehalten werden sal von vns vnd vnfs nachkömelinge czu sicherheit vnd czu warem bekenntniße henge wir vorgeant apt vnd vnfs ganze samenunge vnfs sigil an desen offen briff. Ouch habe wir vnser stat sigil gehangen czu bekentniße an disen offen briff der da gegeben ist noch gotis geburt dryezen hundert jar dar nach in dem soben vnd nunczigisten jare an der mytewochin vor phingisten.

* 1410.

G.-K. pag. 2. Eyn schogk zu Damelwitz, belangende ist die wüste mölen vnd erlich, hinterm schlofs.

[6.] Wir Friderich vnd Wilhelm gebrudere v. g. g. Landtgrauen in Doringen vnd marggrauen zw Meyssen Bekennen Als der gestrenge Hans von der Gane vnser lieber getrewer, eyn wechsel gethan hat, mit den vorstehern der pfarrkirchen vnser lieben frawen zw Borne, also das er ihn eyn schock friberger groschen jerlicher gulden dem dorffe Damelwitz in dem gerichte zw Borne, das er von vns zw lehen hatte, hat gegeben vmb eyn schock groschen jerlicher gulde, der egenant muntze gelegen in der moel hynder dem hause zw Borne, das dem genanten gotshause geeeygent was, vnd das er nu von vns zw lehen entpfangen hat, das wir dem almechtigen got, der loblichen mutter vnd magdt marien, vnd allen gottes heyligen zw lob vnd ehren vnser eldern vnd vorfarn seligen, vns vnd vnser erben vnd nachkomen vnd allen gleubigen seelen, zw trost vnd gnaden, das egenant schock geldes zw Damelwitz der pfarrkirchen vnser lieben frawen vorgeant geeeygent, gefriet vnd gegeben haben, eygen freyen vnd geben ihm das auch als rechtes freyes eygens recht vnd gewonheit ist, vnd vorzeyhen vns alles rechten vnd gewonheit, das wir daran byfs herr gehabt haben, ader in (demel byfs)? daran gehalten mochten mit krafft dieses brieffes vnd haben des zw urkundt vnser insigel beynander an diesen briff wissentlich lassen hengen, hie bey seyn gewest, vnd seyn gezewgen die gestrengen vnser lieben getrewen Er hugold von Slinitz Er hans drugsesz ritter, Nickel von honsperg vnd andere leuthe genug den woll ist zw gleuben. Geben nach Christi geburt vierzehnhundert jhar darnach in dem zehenden jhar am sonnabent vor St. Martini.

* 1417.

Kopialbuch¹⁾ pag. 94 b. Bei Wolfram pag 20. Listenfeld.

[7.] Wir Friedrich . . . der Elter Bekennen das wir mit wohlbedachten vnd gutem vorrathe vnser heimlichen vnserm lieben getrewen Burgermeistern dem rathe vnd

¹⁾ Zugleich als Probe der im Kopialbuch durchgeführten Modernisierung.

burgern gemeyniglich vnser stadt Borna recht vnd redlich verkoufft haben zwey vnd sechzig acker ardtackers vndt eynen freyen hoff in der alten stadt vor Borna gelegen auf daz das sie sich desto bals gefesten vnd gebessern mogen die wier wieder von seyfriede friderichen, Titzen vnd jahne Liste gebrüder gekoufft haben recht vnd redtlich verkoufft haben vmb eyne summe geldes die sie vns nutzlich vnd wohl bezahlt haben also das sy vns vnd vnserm erben alle jar von dem genannten hofe vier vnd zwanzik groschen vnd von itzlichem acker zweene groschen alles guter freyberger muntze halb auf sant walpurgistagk vnd halb auf sankt michaelistage zu rechtem erblichen zinse reichen vnd bezahlen sollen vnd leihen ihn auch vnd allen ihren nachkommen die genannten acker vnd hof zu rechtem erbe zu solchem Zinse als vorgeschrieben steht geruigklich zu besitzen auch der zu gebrauchen mit aller Freyheit vndt rechten als die die genannten liste von vns herbracht haben vnd besessen

1417.

Pergamenturkunde Privilegien betreffend, Siegel verloren.

[8] Wir friderich von gotes gnaden lantgraue Indoringen vnd marcgraue zw missen der Elder Bekennen vnd thun kunt offintlichen mit diesem brive allen den die yn sehin adir horen lesen Alfs vnfs burger von Borne vnd die von lobeschicz ir sache by vns sind blebn zeuentscheiden daz wir darub zwischen yn vzgesprochn habn alfs hir noch geschrebn stet Czu irste daz zcu lobeschicz zewene Cretschmer syn sollen dieselbin melzen vnd bruwen mogen daz getreide daz yn selbir uff ire eigen acker wechset, wolden sy darubir melzen vnd bruwen so solden sy die gersten czu Borne kouffen alfs verre sy dy da veile vinden ane geuerde, konden sy der abir da zcu kouffen nicht bekommen so mogen sy gersten adir malcz kouffin wo sy des bekommen mogen / wolden sy ouch bier schencken daz sy selbir nicht bruweten daz sollen sy nyrgent andirs denn czu Borne kouffen waz sy ouch biers habn daz sollen sy daselbins zcu lobeschicz schencken vnd nicht mit vassen uff daz land vorkouffen ane geuerde / Ouch sal da siczen eyn Smyd eyn Snyder vnd czwene schuwerchten aldrufsen vnd des czu bekennisse habn wir vnfs Secret wifsintlichen an diesin briiff lafsin hengen der gegeben ist nach gotes gebort vierezenhundirt vnd darnach an dem Sybenczenden jaren an dem achten tage der heiligen drierkonigetage.

* 1420.

G. K. pag. 3. Der Probstey vnd frumefs Zynfs belangende.

[9.] Wir Nicolaus von Buckewitz vferwelter vnd gekorner apt zw Pegau, Johannes prior, Nicolaus sangmeyster, Johannes custos vnd die gantze samenunge gemeyne des gotshauses zw Pegau Bekennen offentlichen mit diesem brieffe das die Erbarne weysen burgmeyster vnd rathsgeschworne der stadt zw Bornn, vnd die gantze gemeyne daselbst vnser pfarrleuthe, mit vns in tedingen gewest seyn, in vnser pfarhe, ader probstey zu borne vmb vorsessene vnd vorhaldene zynse, der sey gewest wenig ader viel, vnser mōchs des ewigen althar belesers vnd in vnser kirchen zu borne, die ihm vorhalden vnd nicht gereicht worden, in der Zeyt vnd weyle er die Meß nicht erhilt noch bestalte, also das sich die stadt zu Born vnser pfarrleuthe mit vns, vnd dem altharbeleser gutlichen vnd lieblichen daromb in eyner freuntschafft geeynet vnd entsatzt (?) haben. Auch ist gereth vnd geteydigt das die stadt zu Born von Ihrem rathause alle jhar jerlichen reichen vnd geben soll, dem althar beleser syeben marg geldes, vnd dem probste eine marg, ader syeben schildechte schock, vnd dem probiste eyns vff zwo tage zeyt, halb vff walpurgis, vnd halb vff michaelis, dieweyle der althar beleser die ewige meis heldet, ader bestellet, Mehr ist gereth vnd geteydigt, das wir vnd vnser monche der althar beleser, vnd die stadt zw Borne alle stuck wort vnd artickel die da geschrieben stehn, in den zweyen hauptbrieffen des ewigen althars halten sollen, vnd wollen ane arg, nemlichen ist gereth vnd geteydingt das wir angesehen vnd bedacht haben den gelymp vnd dinst vnser pfarrleuthe der stadt zw Borne das sye sollen

reichen vnd gereicht haben, vnserm monche dem altharbeleser acht reynisch gulden ihm zw eyner hulffe vnd widerstattung vor die vorsessene zynfs was der ist vnd geseyn mag, vnd wir nach vnser monch der althar beleser sollen noch wollen nicht mehr darumb reden noch tedyngen sondern wir sagen sye der vorsessene Zynfs genugklichen gantz und quit, vnd ledig mit krafft dises brieffes das dise vorgeschriebene rede vnd entscheydunge also gereth vnd geteydinget ist vnd die gantz vnd gar, fur vns vnd vnser nachkomlinge vnd, der stadt zw Borne gehalten soll werden (1420) an der nehisten mitwoch nach S. Martinstage.

1426.

Rechtsbescheid mit Erhalt. Siegel.

[10.] Wir friderich von gotes gnaden herczog zcu Sachsen des heiligen Romischen Richs Erczmarschalk lantgraue Indoringen vnd maregraue zcu missen Bekennen vnd thun kunt offintlichen mit dissem Brieue Allen den die yn sehen horen adder lesen / Als wir etliche schulde hatten zcu Peter foyfen kindern vnd zcu den gutern die peter foylse gelassen hatte / in der pflegin vnd Stat Borne gelegin zcum ersten das der kinder neheste frund als Benedictus foyse der kinder vater Bruder vnd Matthis vnd Nicolaus Isenberg der kinder muter Bruder / gut habe vnd garn vñ vnsm gebyte vnd lande haben gefurt vnd furen lafsen / das doch hans Alleveld czu den geczyten vnfs voit czu Borne offinberlichen hat lafsen vorkumern vnd vorbieten wegezufuren vñ vnsm lande mit der Stad froneboten zcu Borne uf dem frien maregte / daran sich der vorgnten kinder frunde nicht enkarten Sundern sy furten dy vorkumerte vnd vorbottene habe weg freuelichen mit ires selbis gewalt vnd swechten vnfs gerichte domitte / vmb soliche swechunge vnd obirfarunge vnfs gerichtis waren wir von yn mutende virhundert guldin / Czum andern das sy an der selbigen habe vnd gute vns vnfs gleite vnd czol entfurten mit ires selbis gewalt vnd vnrechte / Vmb solichen hoen vnd schaden waren wir abir von yn mutende czwerhundertguldin / Czum dritten das der vorgnte Peter foylse seliger sich yn vnsm lande vnd gebyte vorburgens schacces gekdes vnd fromdes gutes vnderczogen vnd vnderwunden hat mit vnrechte, wenn solicher schacz vnd gut mit merem rechte vns vnd vnfs herschafft an gehoret hette denn yn adder syne erben / den schacz vnd gut wir wirdigen vf anderthalbhundert guldin / Als boten vns dy Burger zcu Borne vnd teidingitten zwischen vns vnd den selben kindern vnd iren frunden / das wir durch irer flifsigen beten willen vor alle schult dy wir zcu den kindern vnd gutern hatten / hundert nuwe schog grosschen namen vnd dorumb alle bruche vnd sachen gutlichen lifsen berichtet syn Des czu Bekentnisse haben wir vnfs Ingefsigil wissentlichen an dissen Brieff lafsen hengen. Gegeben czu lipczk am fritage nach Circumcisionis domini anno vicesimo sexto.

* 1430.

Stadtbuch p. 12 b¹)

[11.] Wir Burgermeister Ratmanne der Stat Borne bekennen offintlich mit dissem brive vor uns vnd vnser nachkommen Noch dem also der Erwardige in got vater und herre

¹) Das Kopialbuch, pag. 108b weist eine in demselben Jahre von Bischof Johannes (später in Hugo corrigiert) ausgestellte Urkunde auf: das wier mit der vnsern solche schwere grosse vndt vnvorwindlichen schaden als vnser lieben getreuen Bürger gemeinlich in Borne an der Stadt an ihren eigen gebäuden, an getreide an gerade an andern ihren hausgerethe vndt dingen von den verdampften ketzern von brandes vndt ander nahrung wegen genommen haben, angesehen geachtet vnd betrachtet haben, undt das sie nuhn desto bafs wieder gebauen undt sich wieder zu nahrung geschicken können vndt mogen So haben wier sie solcher jerlichen Rente vndt nemlichen dreifsigk schock groschen die sie halb of sanct Walpurgis vndt halb of sanct Michaelis tage jerlichen von der Stadt wegen pflichtig zu geben sindt vor vns vndt vnser nachkommen gnediglich gefreyet vnd freyen sie der gegenwertiglich Neun ganzer jahr die ohne mittel nach einander folgen also das sie solche obengenante jehrlichen Renthe die neun jahr vns nicht bezahlen sondern solcher zeit ganz vndt gar ledig vnd los seyn sollen ohne gefehrde Wie die Abweichung im Namen des Bischofs zu erklären, ist mir mangels eines Verzeichnisses der Bischöfe von Naumburg zu entscheiden unmöglich.

herre Peter Bischoff zu Nuemburg vnser gnediger liebir herre vns dorch vnser trefflichen vnd vnvorwintlichen schaden willin den wir von den doringen vnd den ketzern von behmen zu brande vnde andern vnsern gutern entphangen haben gnediglich vnser jarrente dy wir synen gnaden ierlich phlichtig sint zu reichen Sobin jar an hebinde uff sente michaelstag nehist vorgangen vnd noch einander volginde gefriet vnd vns ouch sollicher pflicht dy wir im von des gerichtes wegin jerlich zu gebin phlichtig sinth uff ditz jar vor sehin hat das wir synen gnaden mit flisse dangken das wir denselben synen gnaden geret vnd globit habin Redin vnd globin mit crafft disses brives wen dy vorgeantent sobin jar vorrugken und vmb kommen, daz wir denne alle jar vnd iczlichs besundern dem selben vnsern gnedigen herren adir synen nochkommen solliche jar rente in masen also vor reichen vnd geben sollen vnd wollen. Ouch wen dis geinwertige jar vorrugkt so sollin vnd wollin wir sinen gnaden vnser gerichtegeld alle jar in syne kammer reichin vnde bezalin ane hindirnifs vnd geverde. Das zubekentnisse etc. datum feria secunda thome apostoli anno dni etc. L^{mo}.¹⁾

* 1439.

Urfede, Stadtb. pag 4 b.

[12.] Wir burgermeistere vnde Rathmanne der stat borne bekennen uffintlichn mit dissem brife vor alln die den sehin horen ader lesin sunderlich vor euch wirdiger gestrenger er Cunrath Burgkirsdorff houbtman zcu Swebissn burgermeister vnd rathmanen eldestin gewerkn vn der ganczen gemeyne daselbist | daz vor vns in heymlichkeyt | vnfs gesessens rathis komen syn dy vorsichtigen vnfs libn meteburger vnd inwoner Thomas hug Hans Hennigken nichil bottich frantze sprutezen vn habin globit in vnfs kegnwertikeit vnd globn in macht | ditz brifes euch gnter er houbtman burgermeister vnd rathmann eldestn gewerkn vn der ganczen gemeyne der gntn stat | swebissin vor johansen meder hans meders son ettwann vnfs meteburgers vor eynen rechten orfreden daz der gnte johanne der mit alln synen frunden geistlich ader werltlich eynen cristlichn orfrede zcu ewiger czyt euch obn gnanter er Cunrad burkirsdorff vn dem orden senthe johanse in der marke vn dem lande vn stad Swebissin vn alln inwonern dy iczunth sein ader in zekunfftign czythn werden solln halden vnd her noch die synen euch noch awer nochkumelinge obgnt nymer anfangn sullen mit geistlichn ader werntlichn gerichte mit rechte ader hinder dem rechte furdern ader sy bekumern sullen in eimegirley wyfs wy er daz zcu wege bringn mochte an allis arg vn gefeer darumb daz er in der stat hafte vnde gefengnis zcu Swebissin obgnt vmb etzlicher gefelschter war darobir her begriffen waz vn vorrecht bracht wart vn do abegebetn ist | gesessin hoth an allirley wedirsprechlichkeyt an arg des zcu geczugknis habn Wir burgermeister vnd rathmann obgnt vnfs gntn stat Sigil an dissin briff lasen hengin nach gots gebort M^oCCCC^oXXXIX^o quarta feria post mauricii.

1440. *

G. K. pag. 5 b. „das hospital vor dem aldenburgischen Thor belangende.“

[13.] Johannes dei gratia episcopus Merseburgen. honorabili scholastico ecclesiae nostrae Merseburgensis sive eius commissario ac illi vel illis quem vel quos infra scriptum concernit negotium seu tangere poterit quolibet in futuro Salutem in domino sempiternam Pridem orta materia questionis inter discretum dominum Johannem sapientem rectorem altaris hospitalis in opido Bornis nostrae diocesis ex una ac strenuos viros dictos de kitschere collatores dicti hospitalis nec non providos opidanos dicti opidi Bornis ac quosdam reddituarios dicti hospitalis de et super censibus et emolumentis ac missis et oneribus

¹⁾ Die doppelte Einäscherung Bornas 1430 u. 1450 ist zweifelhaft, da die Darstellung im Stadtbuch verworren ist und beide Brände auf das gleiche Datum verlegt.

atque honoribus eiusdem hospitalis partibus ex altera, Tandem nos huiusmodi causam et questionem ad instantiam ac petitionem dictarum partium ad Reverendum in Christo patrem et dominum dominum Petrum episcopum Numburg. pro nunc dominum temporalem dicti opidi remisimus audiendum decidendum et sine debito terminandum tam in iure quam amicitia Qui quidem dominus ad sedandum huiusmodi lites et redimendum vexationes dictarum partium hinc inde ipsas partes super dicta controversia amicablem concordavit videlicet cum dictus dominus Joannes Sapiens dictum hospitale ad manus dictorum collatorum resignare libere deberet quodque sibi in redditibus dicti altaris certa portio annis singulis reservaretur videlicet una sexagena novorum grossorum missenen. solvendum in festo sancti Michaelis pro possessione dicti hospitalis et suos successores ad tempora vitae dicti domini Joannis et cum hoc omnes lites controversiae sive querelae inter ipsas partes habitae debent esse totaliter sopitae et extinctae Nobisque per dictum dominum episcopum ac collatores nec non opidanos ac dominum Joannem praedictos fuit humiliter supplicatum quatenus huiusmodi concordiam ratam et gratam habere Ac dicto domino Joanni Sapienti dictam sexagenam grossorum novorum singulis annis sibi solvendum in festo sancti Michaelis in fructibus dicti hospitalis ad tempora vitae suae reservare dignaremur Nos dictarum partium supplicationibus conniventes dictam sexagenam grossorum novorum dicto domino Joanni Sapienti ad tempora vitae suae per rectorem dicti hospitalis qui nunc est et suos successores solvendum reservamus ac dictam concordiam ratam et gratam habemus per praesentes Vobisque commissario dicto Scolastico mandamus quatenus discretum dominum Joannem Stegeman cui dictum hospitale per Strenuos Reynhardum et Thymonem de Kitschere armigeros collatum existit, Ad ipsum hospitale instituatis adhibitis circa hoc sollemnitatibus debitis et consuetis quem etiam pro manuali oboedientia nobis facienda ad vos remittimus ac sibi et suis successoribus mandamus in virtute sanctae oboedientiae dictam portionem dicto domino Sapienti ut praemittitur solvendum harum quibus sigillum nostrum est appensum testimonio literarum Datum Merseburg anno a nativitate domini millesimo quadringentesimo quadagesimo feria quinta proxima post dominicam qua cantatur in ecclesia dei quasi modo geniti.

1442.

Originalschuldbrief. Siegel verloren.

[14.] Ich Hanns vonn der Jhann czw gestewitz gesessenn als selbschuldiger Casper vnnd merten von der Jhan gebruder mit behelender Bekennen offentlichen wo noth vor vnns vnnd alle vnns erben vnnd erbnemen das ich hanns mit czw statunge vnnd vorwillunge meiner bruder recht vnnd redelich vorkoufft habe vnnd inn krafft diesses briues vorkouffe der bruderschaft czw der Calende der stat bornne gehorende alle jare jerlich vff meinem dorffe hawbwitz czwey schogk der bestenn muntze also beschelich eyn schog vff Johannes baptiste das ander schogk vff purificationis marie czw geben vnnd czu bezallenn der weille dieser kauff stehet vnnd nicht wider ab gekoufft wurde vnnd habin inn das erste β gegeben vnnd vorkoufft vor LX reinsche gulden vnd das ander vor XVI schogk der besten hochisten muntze das sy mir bor vber vnnd bereith woll czw dangke bezalt habenn Dor off bewillige ich ouch do mit dem gedachten Calendt vnnd bruderschaft eyn gunst vnnd vorwilligens briue vbir sulchenn wider kawffe von meinen genedigisten vnnd gnedigen herrn szo uffte das des noth seynen wurde vff meyn eigen kost czerung vnnd schedenn vs czw richten vnnd den in czw vbirantworten doch mit dem gedinge das ich inn den ersten vor michaelis vnvorzoghlich aws gewynen vnnd schicken soll Szo ich aber do mit sewmigk ader lenger vorzogh machen wurde das inn keinem wegk seinen soll vnnd sy der halben eynigen schaden wie der namen gehalten mocht nemen ader entphagen wurden den schaden will ich allen tragen sy schadlos halten als vfft das noth sein wurde / szo ich mein erben ader erbnemen an den czinfsen vff eine ader meher tagezeit sewmigk vnnd nicht bezallen wurden / szollen vnnd mogen die vorsteher der calendt mich meine erben vnnd erbnemen darczw alle mein leuthe czw hawbwitz mit geystlichenn ader wert-

lichen gerichtten wie in das recht vnvorhindert geystlich ader wertlich gebot vornemen Dor in ich keinen schutze were ader behelffe durch mich noch nymants anders suchen will ader vornemen vnnnd ob sy einigerley schaden der nicht bezallung halben der czinfse vff eine ader meher tageczit entphagen wurden wie der schade namen hette das mogelicher schaden were den gerede vnnnd gelobe ich allen czw tragen vnnnd der Calendt czw erstatten ane alle geferde argelist ader behelffe Hir vff haben mir die itzundt Calendt bruder vnnnd ire vorsteher vor sich vnnnd alle yre noch komende mir meinen erben erbnemen vnd mit belehenden die gunst fruntschafft vnnnd gutten willen erzeiget Szo ich meine erben ader erbnemen szo stathafftigh wurden vnnnd sulche czinfse wider czw vns kauffen wolten eynsteilles ader gar welche vns recht seynen wurden szo sollen wir das denn vorstehern der calendt eynn virtell jare dor vor der czinfse tage einen welchen ich ader meine erben czw vnns wider kawffen wolten ab vnnnd vff schreiben alße dan gerede vnnnd gelobe ich sulche bezallunge der XVI schogh ader LX gulden wie ich vffte geschriben habe mit denn vorsessenn czinfsen vnnnd schedenn dar vff geloffenn gutlich czw bezallen / czw entrichten das inn ganz gnuget also vnnnd nicht eher wen ich der schogh eyns habe abgekawfft szollen sy mich vnnnd meine lewthte do mit vs czins pflicht lassen mir diessenn brive wider vbir antworten vnd vor das andre schogh eyn neue vorschribunge lauts diesser als noth von newes machen dor czw gerede ich einen adernn gunst briue dor vbir zw schickenn Das alle stucke punctt vnnnd gesetze diesses briues stete feste ganz vnnnd rugelichen sollen vnnnd mogen gehalten werden vorschreiben wir vnns bestympten diesses briues mit der aller besten forma ordnung vnnnd weis die aws krafft der geschriben recht hirzu mogen gehorenn dor czw bey vnser trawen waren worten Des czw warer bekentnus habe ich hanns von der jhan als sache walter vnnnd selbschuldiger ich casper vnnnd merten von der jhan alle gebruder samt mit behelender itzlicher insunderheit seine insigell vor vnns alle vnns erben vnnnd erbnemen hir an diessen offen brive gehanngenn der gebenn ist nach cristi geburt tausent virhundert vnnnd dornach inn dem czweyvnnndvirczigisten jare der mynder czall am mitwochen nach dem sonntag cantate.¹⁾

* 1450.

Stadtbuch pag. 10. Copia lie civium de Gytan censuum ppetuorum vl Reempciois.

[15.] Wir gesworne Burgermeister Burghard nethir Thomas hug matt. bendorff / hans herould Syfford malan Nickil Cratz vnd hans heilhard gesworne kumpan. dye ganteze gemeyne zu Borne Bekennen eyntrechtlich vor vns vnd alle vnser Nochkomelinge in dissem vnsern offen brive vor allen dy on sehin adir horen lesin das wir mit wolbedachten muthe / mit vorrathe dryer Rete willen vnd wissen der gantezen gemeyne vorkouffen vnd vorkoufft haben mit crafft disses brives den erlsamen wiefin burgermeistern Rathmannen vnd der gantezen gemeyne der stadt Gytan vnd den kirchvetern sancti Nicolai do selbinst adir wer dissen briff mit orem guten willen vnd wissen innehat drye schog nemelichin fribergischer monteze adir also vil kleyne monteze also vor eynen groschen geth / adir was da genge und gebe ist in vnser gnedigen herren lande zu eynem ewigen Salve Regina alle jar jerlichen zu syngen alle tage in der fasten vnd alle sonnabend ym jare vnd zu andern gots dinste mehri des selbigen vorgemelten gotshaws jerlicher czinfse uff unserm Rathawse zu Borne also uff eynen widderkauff uff czw tageczite Nemelich uff Sente michaelis tag nehist zukunfftig noch gebunge disses briues vunfftehalb alde schog dor noch uff walpurgis schirstkomende aber vunfftehalb ald schog ane alle geuerde dor noch alle jar jerlichen uff solliche tageczit solliche czinfse zu reichen also obin berurt ist dorvor vns dy gnten burgermeister Rathmanne mit wissen vnd willen der Gantezen gemeyne der stat Gytan vnd der kirchvetere do selbinst wol zu dangke bezalt vnd gegeben haben funffvndvirczig schog friberschir monteze dy wir kundlich an vnser stat notdorfft gewant haben Dor umb so geredin wir obgeschrebin

¹⁾ Die Siegel sind verloren. Offenbar eigenhändig vom Aussteller geschrieben, die Handschrift ist originell.

Burgermeister Rathmanne vnd vnfs Nochkomelinge der sta(t) Borne ane allen intrag widderrede vnd argelist dy wile wir die funffvndvirczig schog innehaben alle jar jerlichen gutlichen uff unserm Rathawse den obgnen von Gyten adir den dy dissen briff mit orem guten willen vnd wissen innehaben zu bezalen auch ab wir an der bezalunge sumig wurden vnd nicht uff solliche tagezeit also obin geschr. stehit bezalten / was sy denne schaden dovon entphingen is were an batelone briuegelde / an nochreyßen adir wie der schade gethan wurde den schaden vnd allen mogelichen schaden gereden wir obgnen selbschuldigen gutlichen widder zu keren also offte daz not geschege ane arg vnd geuerde. Ouch sol an der bezalunge ores czinfses vnsern kouffern adir wer dissen briff mit irem guten wissen vnd willen innehat keynerleye herren gewalt / fede des landes / noch keynerleye vorbytung geistlichs adir werldlichs gerichts Noch keyn gebruch der do were adir wurde an dissem briffe an schriff / an ingesigil / an beslegkunge nichts schaden auch ob disser briff von fuers not adir wassers gewalt abeginge das kundlich und offinberlich wurde so gereden wir vilgemelten selbschuldigen den offt vnsern gnten vorkouffern bynnen eynem manden eynen andern vor sigilten so guten briff widder zugeben an allis geuerde. Auch ob wir vilgnen selbschuldigen adir vnfs Nochkomelinge so stathafftig wurden vnd solliche obgeschreiben jerliche czinfsen widder zu vns losin vnd kouffen welden so sollin vnd wollen wir vilgedachten selbschuldigen vnsern gloubern eyn sollichs vor eynem halben jare vorkundigen / vnd also vil geldes nemeleichin vunffvndvirczig schog widder dor umb geben sollicher bezalunge noch also sy vns gethan haben sobinczwenzig guld. an golde gut vnd swer gnug am gewichte Rynisches goldes das hinderstellige an friberschir monteze also genge vnd gebe wert in vnser gnedigen herren lande also das dy vunffvndvirczig schog irfollet werdin das vns willichen abetreten sollen ane geuerde uff welche tage czijt vns das gefellich wurde Das alle vorgeschrebene rede stugke vnd artikel stete veste ganz vnd vnvorrugt von vns vnd vnsern Nochkomeligen vestlich gehalten werden haben wir obgnen burgermeister vnd Rathmanne der stat Borne / zu orkunde vnd mehri sicherheit vnfs stat sigil wissentlich an dissen offin briff lasen hengen der Gegeben ist noch Cristi gebort Thusent vierhundert jar im funffzigisten jare den nehisten fritag vor viti des heiligen merterer.

* 1450.

Stadtbuch pag. 10 b. Copia Ire censuum dni Johannis bergaws et magri ciium Burgkardi nethirs tpalis.

[16.] Wir Gesworne Bekennen das wir vorkoufft haben . . . dem Erlsamen ern Johansen Bergaw czhen alde schog vnd czwene groschen friberschir monteze also genge vnd gebe ist / adir werth in unser gnedigen herren lande jerlichs czinfses uff czwene liebe vnd uff czw tagezeit Nemlich uff sente michaelstag nehist zukunfftig noch gebunge disses briues funff alde schog und eynen groschen friberschir monteze Dor noch uff walpurgis nehist folgende abir funff alde schogk vnd eynen groschen also obin berurt ist / ane allis geuerde / solliche summe geldis gereden vnd globen wir obgeschreiben burgermeistere Rathmanne vnd dy ganteze gemeyne der stat Borne zu reichene vnd zugebene dem obgnen ern Johansen Bergawen uff solliche ob geschrebene tagezeit adir bynnen vierzentagen dor noch vnd solliche czinfsen antworten gein Czitz in unser herberge adir by dryen milen wegis vmb Borne wo wir hen vormanet werden uff unser czerunge ane lengern uffzog / die wyle er lebit / were is abir sache des Er Johannes von todes wegen abeginge so sollin die obgeschreiben czinfsen also vff dy obgnen tagezeit Burgkarden Nethere dem ob genumitten Burgermeistere die wile er lybet vnd lebet folgen Vor solliche obgeschrene czinfsen hat der gnthe er johannes bergaw vns wol zudange dryssig schog vnd achezen gr. friberschir monteze bezalt das uns wol genuget die wir an vnser Stat nutz vnd frommen gewant haben Vnd wenne dy obgeschreiben czinfsen an Burgkarden Nethere kommen Noch ern Johansen tode So sal er alle jar jerlichen von sollichen czinfsen vnsern liebun frawen in vnser pharkirchen zu Borne adir irren vorwesern den altirluten vnd kirchvetern reichen vnd geben funffzig groschen friberschir monteze Do von ern Johansen

Bergawen offt gnt / eyn begengniß mit eyner gantezen vigilien vnd dryen Selenmessen gesungen / bestalt sal werden / zw messen den liebn selen zu troste die dritte messe von vnser liebin frawen. Ouch ab wir obgeschr. Burgermeister vnd Rathmanne adir vnßs Nochkomelinge an der bezalunge der vorgedachten czinße sumig wurden was denne schaden doruff gethan wurde / an bate lone / briue-gelde adir nochreyßsen den schaden vnd allen mogelichen schaden gereden wir obgedachten selbschuldigen glich dem houbtzcinße ane allis geuerde widder zukerin Ouch an der bezalunge der czinße sal den vilgemelten vnsern kouffern keynerleye herren gewalt noch fede des landes adir vorherunge der stat da got vor sy noch keyne vorbitunge / geistlichs adir werldlichs gerichtß noch keyn gebruch der do were / adir wurde an vnserm briue an Ingesigil an befleckunge nichtis schaden Ouch ab disser brieff vorbrenthe / vorlorn adir vorwarlust wurde so gereden wir iezunt gnten selbschuldigen vnsern kouffern eynen andern so guten vorsigilten brieff widder zugeben ane geuerde also digke das not geschiet. Das alle vorgedachten artikille vnd stugke gancz gar vnvorbruchlich gehalten werden haben wir obgeschr. burgermeister vnd Rathmanne der Stat Borne vnser stat sigil vor vnßs vnd vnßs nochkommelinge wissentlichen an dissen vnsern offinbrieff lasen hengen Der gegeben ist noch Cristi geborthe Thusent virhundert jar dornoch in dem funffzigisten jare am Sonabede an der heiligen czhen Thusentten merteren abende.

* 1456.

Stadtbuch pag. 17 a. Copia Ire censuum et Testamenti dni Pauli Sartor. de glouchaw.

[17.] Wir nochgeschr. kerch vnd altarvetere des gotishaws zu Borne zu vnßs. liben frawen nemelichen hans Ritter vnd hans von Borne uff dy czit Bekennen in dissem vnßs offin briue vor allen dy on sehin ader horen lesin / das wir mit gutem willen wissen vnd gunst dryer Sitzenden Rethe vnd der Houptleute mit iren Kumpan von wegen der gantezen Gemeyne deme andechtigen Erßsamen herrn ern pauale Sartor. adir Snider von Glouchaw uff synen libp dy wyele er lebit alle jar jerlichen czhen rynische guldene czinßes von deme gnten vnßs armen gotishawße on dy zu czinßsen vorkoufft haben also vor hundert rynische guldene dy er vnßs denne wol zu willen von des gnten vnßs armen gotishawses wegen bezalt hat das vnßs genugeth Solliche obgnten czinße wir vnd vnßsere nochkomelinge deme gnten herrn ern pauale alle jar jerlichen dy wyele er lebit uff czw tagecziite geben vnd bezalen sollen nemelichen funff gulden uff den nehist folgenden sente michaelis tag noch gebunge disses briues vnd dor noch uff sente walpurgis tag abir nehist folgende auch funff Rynische guldene / adir also vil monteze also eyn rynisch gulden uff dy czith ganghafftig zu kouffene gewonlich ist / doch nicht by deme niderßten noch by deme thuergisten vngeuerlichen geben vnd bezalen sollen vnd wollen vnd wen der itezunt gnte andechtige vnd erßsame herre er pauel von todis wegen abegeth das goth lange friste So sollen vnd gereden wir obgnten altar vnd kerchvetere des gedachten vnßs armen gotishaws zu vnßs libin frawen zu Borne vor vnßs vnd alle vnßs nochkommelinge auch mit wissen willen vnd gunst dryer Rethe uff dy czit vnd der houptleute von wegen der gantezen gemeyne obinberurt vorwillet nemelichen eyn Testament alle jar jerlichen des jares eyns mit vigilien vnd selmessen zu bestellen sechzig jar noch enander folgende vnd vor dy selen syn vnd syner eldern zubittende dor noch erst denne sal sollich Testament itezunt benümith von deme gnten vnßs armen gotishawße abefallen vnd loß syn Auch worde is sache werden das Orthie des offt gnten ern pauls Mume vnd frundinne hansen bruwers tochter alhir zu Borne den erßsamen herrn pauale noch schigkunge gotis obir lebin worde So sollen vnd wollen wir vorgnten kerchvetere vnd aller vnßs nochkomelinge der gnten frawen Orthien dy wyle sy lebit alle jar jerlichen vier guldene czinßsen ader monteze vor eynen gulden uff dy czit ganghafftig obin berurt, nicht mit deme thuergisten geben vnd bezalen uff czw tage cziite obin berurt vngeuerlichen noch deme sich des noch des Erßsamen herrn ern pauls tode ergeben worde czwene guldene uff walpurg. vnd czwene uff michaelis so ane arg vnd alle hinderlist zu czinßsen von deme vnßs obgnten gotishawße ane alles geuerde Des wir denne solliche alle artigkele vnd stugke obin berurt in geinwertigkeit dryer sitzenden Rethe vnd der houptleute von

wegen der gantezen gemeyne mit irem guten willen vnd gunst / sy mit vns vnd wir mit on von vnss armen gotishawfs wegen ane arg vnd hinderlist gentzlichen stete vnd veste ane alle geuerde gereden zu halden des zu warem vnd sicherem bekennisse haben wir obgeschr. kerchvetere vor vns vnd vnss nochkommelinge der Stat Sigil mit wol bedachtem vorrathe vnd wissen der dryer Rethe vnd auch der Gemeyne an dissen offinbrieff von vnss gotishawfs wegen zu vnss libenfrauen lasen hengen der gegeben ist noch cristi vnssers herrn gottis geborte vierzehenhundert in deme sechs vnd funffzigisten jare am mantage noch des heiligen waren lichenams tage vnd noch des heiligen babistes sti vrbani tage.

1456.

3 Siegel erhalten, 4 fehlen.

[18.] In deme Namen der heiligen dryen valdigkeit Gotes des Vaters | des sons | vnde des heiligen geistes | amen | Sintdemal alle ding dy da in der czijt sinth auch mit der czhit vorghen | so ist das wol notdorfft das man sy mit ewigkeit der briue bestetiget vnd bekreffiget | uff das der heilige gotes frede volkommelicher vnd vorder vnder nahen Nachewern gehalten werde ezweitracht | errethum | ergerunge vnd abegunst vormeden. | Dorvmb haben betedingeth dy Erbar Ernvesten vnd Gestrengen | Caspar von Hogenist uff die czijt voit zu Borne Cunrad von Czemen zu Ulschaw gesessen | Melcher von Wolkaw zu Czedelitz gesessen | Thime von Kitzscher zu Steinbach gesessen | Brufser von horberg zu Kanifsdorff gesessen | uff dy eine parth | Vnde dy ersamen wiesin Nicolaus Cratez | Borgkard neter Borgermeistere | mattis Snider | mattis Bendorff von dryen Rethen vnd der gantezen Gemeyne den volkommene moege vnd macht aller irer sachen zu haben eintrechtlich dor zu awfsirkorn uff dy andere parth | haben dy alle itzuntgnte parthe noch gottis gunst | vnd allem irem vormogen eyntrecht disser noch geschreben sachen halben gemacht | czwyschen deme Erbar vnd gestrengen mertine von der Gane | Nickille von Stenen synem molnere in der holtez mol vnd der Stat von Borne vmb schelenifs zweybruche vnd mancherhande errethume der sy denne mit beyder irer parth wissen vnd gutem willen gutlichen bericht vnd gescheiden sinth worden hinnenvorder mehr von on | iren erben | vnd erbnemen solliche wolgerichte sachen | stete | veste | vnd gantcz zu halden. | Nemelichen vmb den cleynen vyhe herten so bescheiden wen der gnte Nickll von Stenen der holzmolner syn vyhe vortribet | syne Erbin vnd nachkommelinge | so sal er vnd syne nachkommelinge der Stat eyne margk schossen so uffte man in der stat geschos pflaget zu nemen vnd also vil also ein Mitteburger zu geschosse uff dy czhit gibbet uff eine margk | worde aber der molner adir syne nachkommelinge nicht vortriben so sal sollich geschos der selbigen eynigen marg von des vortribens wegen geschofst vngeuerlichen abe syn vnd vallen | Sal auch der molner und alle syne nachkommelinge dy halbe marg von des flegkes wegen nebin der schunen hynnenvorderer nicht mehr vorschossen. | Vort mehr sal der gnte Nickll holtez molner vnd alle syne Nochkommelinge nicht mehr wen um eynem malteze von vier vnd zwenzig scheffeln eyns scheffels mehr adir weniger vngeuerlichen ezhen metezen zu lone nemen | doch brenget ymant von zwenzig | scheffeln zu malen der sal auch ezhen metezen zu lone geben | dorzu sal der molner eyn gesinde haben das dy maltz shegke uff den eseln gerichten kan das nicht schade dar zu gesche vngeuerlichen uff vnd abe helffen zu laden | Sal auch die Stat vnvorunden syn mit deme molnere zu malen | so sal der molner widder vnvorunden syn zu der stat zu malen | Ist auch vorlachtet worden mit steynen | czhune | reynen | des molners guth vnd der Stat gemeyne eyn teilsteyne mittene in dy lachgraben gesatzt | Sal auch der molner alle krumme wyden gein der Statgraben abethun dy dorin ader dor obbir hangen | worde is aber nodt werden das dy stat ire Statgraben wegen ader vestigen worde so sal der molner vnd alle syne Nochkommelinge noch der Stadt geheyse alle dy selbigen wyden abehauwen also uffte das nodt wert | vnd andere widder stegken ob is om ebinth | Dor zu sal die stat deme molnere gunnen in syne mol zufaren vnd der molner der stat gunnen

zu yrem graben zufaren by der abesythen der schunen also uffte sy das bedorffen zu yrem leyne | Sal auch dy stat also vor aldere ye gewest ist eyne fryen stigg dorch dy möl haben vnd solliche stegele by deme Stat Tiche by aldere auch ye vorzhunet von der Stat gevertiget vnd gemacht werden | vnde den abezug des stat grabens hinder der möl halden also der byfs her gehalden ist worden. | Auch also der vorgnte Erbar vnde Gestrengere merten von der Gane mit gutem bedachten willen der stat den roren gang gegunst hat an gesehen betracht vnde bedacht den grossen gemeynen nutcz vnd mancherhande gotis lon dovon entstehende | wil vnd sal er den selben roren gang mit alle synen Erbin vnd Erbnemen vnd Nochkommelingen hynnenvorder vngehendert williglichen gunnen vnd so uffte der stat zu sollichem roren gezuge den zuvertigene | dor zu czusehinde nott syn werdet sal mit willen vngehendert gegunst werden | worde denne deme mehri gedachten Erbar merten von der Gane synen Erbin erbnemen allen iren nochkommelingen ader wen das belangen worde schade an graße gethan das sal dy stat vorfugen mit gunst | sune | ader bezalen noch biderwer lute erkennenisse vnd ob dy Stat das wasser in deme slofs graben by der hawfsmöl do dy roren inne legen abelassen worden ire roren zu vertigene sollen sy sollichen tham des abezuges also er vorgewest ist widder vertig machen | Solliche verwillunge haben beyde parthe obingnt gereth itzlicher vor sich | syne Erbin vnd Nochkommelinge stete vnd gantcz zu haldene vnd vns gebetin vnser itzlicher syn ingesigil an disse betedinges briue zu hengene vns vnde vnser erbin ane schaden vnd wir obingnte vorwesere uff dy cziit der Stat zu Borne vnd auch mertin von der gane haben itzlicher syn Sigil by der gnten Thedingesluthen Sigille gehangen zu vordern vnd merem bekentnisse vnd czu steter haldunge. Worde auch ir keyn Sigil an dissen briuen wandelbar zu breche abe vile adir gebreche | adir dy schrifft vor alder vorbliche vormackelt adir dorchstoehen worde | adir wie solliche briue in fuwers | wassers oder landes nothen abehendig qwemen | noch keyne vorletzung | adir irdachte hinderlist sal widder behelf noch were noch keynen schaden brengen | sundern do sal dy andere parth obingenant welche noch iren brieff vnvorwarlost hat widder zu vornuwen vnd awfszuschribin gunnen lasen vngehendert mit willen helfen das sollich vornuwet briff Nuwe sigille zuvor an beyder parthe nemelichen des vilgedachten Erbar mertins von der gane adir syner Erbin ader Nochkommelingen vnde der Stat Borne angehangen werden | ab man ye der obgedachten Thedingeslute Sigille adir irer Erben nicht mochte gehaben sal auch syn ane schaden | Gegeben nach Cristi vnseres herrn gotes geborte Thusent vier hundert in deme sechsvndefunffzigisten jare an mittewachen noch misericordias domini der heyligen merterer tage Tyburtii vnde valeriani.

* 1457.

Stadtbuch pag. 19a/b. Ern pauel Adams pharrers zu czedelitz copia obir syne lipczinse.

[19.] Wir hirnoch geschreben Mattis bretsnyder Burgermeister, mattis arnold, Jacoff Schiban, Donat Cziczzer, hans Cretzschemer, Hannes Metzener, mertin Jofst vnd michil Pretzschel Radmanne vnd gesworne zu Borne Bekennen in dissem vnfsn offinbriue vor vns vnd alle vnser nochkommen kundthuende allermenniglich dy on sehin adir horin lesin das wir mit gutem vorrathe der andern czwyer rethe, gunst willen vnd volwort der ganczen gemeynde eyntrechtiglich vorkaufft haben vnd vorkouffen geinwertiglich in krafft disses briues deme Erbar Ern paule adam czu czedelitz pharrer nemelich eyn nuwe schog groschen fribergischer moncze in vnfsn herren von Sachlsen lande genge vnd gebe vnd haben om das selbe schog groschen vorkoufft ond gegeben vor acht nuwe schog gr. der obgeschr. moncze dy er vns nutzlich vnd wol zu willen obir gereicht vnd bezalt hat vnd wir sy vortan an vnfs Stat nutz vnd fromen merglichen gewant haben Hirvmb gereden vnd geloben wir obgemelten Burgermeister vnd Radmanne vor vns vnd alle vnfs nochkommen sollich schog jerlicher czinse so lange syn lebin wendet vnd nicht legent gutlichen zu reichen vnd zu geben ane alles widdersprechen intrag vnd geuerde nemelich

drissig groschen genge vnd gebe uff deme steynwege vff sente Johannes bapstentag nach dato disses briues dornoch vff wynachten nehst folgende abir drissig groschen der gnten montze vnd also vort ierlichen solliche czinse zu reichen dy wyle er lebit were es ouch ob wir adir vnfs nochkommen an sollicher bezalunge der gnten czinstage sumig worden vnd nicht bezalten waz denne vnfs glouber kostt czerunge muhe adir arbeit dorch ermanunge syner czinse thun muoste den schaden vnd andern allen mogelichen schaden von vnfs nichthaldunge willen bekommende gereden vnd globen wir den gnten vnfsn glouber mit sampt der vorsessen vortagitten czinfsen ane intrag vnd geuerde gutlichen vnd voll czu dangke zu bezalen Ouch so sal vnfsn glouber keynerleye fursten adir herren vorbath vnd gewalt darzu geistlicher vnd werldlicher gerichte vorbithunge syner czinse erren adir hindern worde auch disser briiff verlorn vorwarlist adir sulst eyncherleye bruchhafftig dor an geschege gereden wir om eynen andern glich deme adir eynen bessern ane alle widdersprechen zu geben vff daz alle punctt vnd artigkele disses contractes von vns vnd allen vnfsn nochkommenden sollen stete veste ganz vnd gar vnvorbruchlichen gehalten werden / haben wir zu mehri sicherheit vnfs stat Sigil vndene an dissen vnfsn offin briiff wissentlichen lasen hengen Der gegeben ist noch cristi vnfs herren gottes gebort vierzehenhundert jar vnde dornoch in deme Sobinvnndfunffzigisten jare an mittewachen am abinde der heiligen entphanngen Marie jungfrawen vnd muter vnfsrs herrn Jhesu cristi.

* 1457.

G. K. pag. 6b. Vber die kalenden sagende.

[20.] Wir hernach geschriebene mit namen Matthis arnolt burgermeyster (mit 7 ratmennen) Bekennen das wir mit guttem vorrathe der ander zweyer Rethen gonst wilsen vnd willen der innigsmeystern vnd der ganzen gemeyne vff eynen widderkouff vnd abzwosen vorkouffen vnd vorkaufft haben mit vnd in krafft dieses briiffs den wirdigen gestrengen vnd ersamen der bruderschafft der kalenda zw Borne vnd allen iren nachkommenden ader wer disen brieff mit irem guttem wissen vnd willen innen hat vier gute vnvorschlagene reynische gulden oder so viel geldes ware als man golt pffleget zw kouffen jerlicher zynse von vnserm rathhause zw Borne vff zwo tagezeyte Nemelich uff S. Michaelis tag zwene gulden anzwehen nach gebunge disses brieffs darnach vff S. Walpurgis tag darnach folgende ader zwene gulden oder soviel geldes als man golt vff die zeyt pffleget zu kouffen ane alle geuerde darnach alle jerliche jhar vff solliche tag zeyte solliche zynse zw reichen vnd geben als oben berurth vnd benumeth ist zw ihren ewigen messen in dem Spital angericht vnd bestetigt, darvor vns die genanten brudere der kalenda zw Borne bereyt vnd woll zu danck bezalt vnd gegeben haben sechzig gute reynisch gulden gut am golde, schwer gnug am gewichte die wir kundtlichen zw vnser stadt nutz vnd notturft gewant haben, diese vorgeanten vier gulden jerlicher zynse geloben wir genanten burgmeyster vnd Rathman selbschuldig mit gesampter hant ane allen intrag widderrede vnd argelist in gutten wharen trewen die weyle wir die vorgeanten sechzig reynisch gulden innenhaben alle jhar jerlichen guttlichen von vnserm Rathhause den egenanten brudern der kalenda zw Borne oder wer disen brieff innen hat zw bezalen Auch ob wir an der bezalunge irgent eyns Zyns seumigk wurden vnd nicht vff solliche tage zeyt als oben geschrieben bezalten was dan die genanten brudere der kalenda oder wer disen brieff innenhette moglicher kost zerunge muhe ader arbeit durch ermanunge Ihrer zynse thun ader haben musten den schaden vnd andern mogelichen schaden reden vnd geloben wir mit sampt ihren vorsessenen zynsen gutlichen zw bezalen ane arg vnd geuerde ; Auch an der bezalung ihrer zynsen soll vnsern kouffern ader ihren nachkommen keynerley ihren (!) gewalt noch keynerley vorbitten geystlichs noch weltlichs gericht nichts schaden Auch ob wir vielgenanten selbst schuldigen ader vnser nachkommende so stathafftig wurden vnd solche vier gulden jerlicher Zynse widder zu vns keuffen wurden ader welden So sollen vnd wollen den vielgenanten brudern der kalenda oder wer disen

brieff innen hat also viel geldes Nemelich sechzigk reynisch gulden gut am golde schwere gnug am gewicht vnd die vnvorschlagen syndt widder darvmb also sie die gekoufft han das sye vns gestatten gonnen vnd williglich abetretten sollen an alle geuerde vif welche tagzeyt vns das gefellig wurde vnd sollen vnsern verkeuffern vorgenant ein halb jhar den widderkauff zuvor verkundigen das sie mit solcher hauptsumma vnd vorwallen zynsen ihr bests mogen geschaffen Das solcher contract von vns vnd vnsern nachkommen solle ganz vnd gar gehalten werden vnvorbruchlichen haben wir zw mehr sicherheit diesen vnsern brieff mit vnsern vnden angehangen Stadt sigil gestergkt vnd wissentlichen befestigt. Nach Christi geburth vierzehn hundert jhar vnd darnach in dem syeben vnd sechzigsten jhare am Sonntag jubilate.

* 1458.

Stadtbuch pag. 93b. (Die Abschriften stehen in anderer Reihenfolge).

[21.] Comparavit dictus dominus georgius hug anno M^oCCCC^oLVIII^o quoddam novum ornamentum videlicet brunaticum scilicet casulam cum singulis suis attinentiis quam fecit consecrari et dictum ornamentum a quadam discreta et honesta matrona Cunssa in grymis dicta dy Brosinfsinne ader gotezschinne et pro salute animae sui filii Johannis gotezschen obtinuit promittens fideliter subordinari ut pro anima eiusdem fideliter orari deberet et ne in posterum huiusmodi ornamentum anulletur tunc hinneale istius ornamenti considerandum est deauratis ac argenteis monilibus ornatum.

[22.] Emit et comparavit dictus dominus georgius hug duos agros a quodam concivi nunc pie defuncto nomine conradt Brunsdorff pro decem antiquis sexagenis quos agros dictus Georgius hug pro salute animae suae ad dictam capellam sancti georgii martyris perpetuis temporibus fruendos libere donavit ac erogavit et censum huiusmodi agrorum libertavit a generoso domino abbate pigaviensi domino Steffano voyte ut sonant literae super huiusmodi facto confectae.

[23.] Item anno domini M^oCCCC^oLVIII^o suscepit dictus dominus georgius hug X novas sexagenas cum consensu trium consulatum a matthes flegke concivi bornensi ad capellam sancti georgii pertinentes et pro illis X sexagenis pratum circa aquam vel retro stubam balnealem aldenburgen. iacentem (!) per X annos cum consensu domini feudalis videlicet hansen conritz impignoravit promittens illas decem sexagenas in dicta temporis revolutione restituere vel aliam cautionem aut subordinationem cum huius anni pecunia subordinare vel alium actorem huiusmodi pecuniae substituere.

* 1459.

Stadtbuch pag. 93.

[24.] Item anno domini M^oCCCC^oLIX^o domicella sive uxor martini deganis etiam unam vaccam pro honore sancti georgii ac profectu rectoris hospitalis praesentavit et dedit, quam dictus georgius hug ab ea suscepit promittens eandem super suos successores hereditare.

* 1459.

Stadtbuch pag. 20b. Copia Ire dnoru in Czitze vmb dy thonne Heringer.

[25.] Wir Nickil kratz Burgermeister.... des itzunt sitzenden Rats | nicolaus kratz Burgermeister.... des andern Rats | Mattis bretsnider.... des dritten Rats und die ganteze gemeyne reich vnd arm ald vnd jung der Stad Borne Bekennen.... das wir vorkoufft haben

vnd vorkouffen . . . den geistlichen vnde werdigen herren vnd brudern der gantzen sampnunge alt vnd jung vnd vorstehir des Closters zu Czitz Sancti francisci ordinis vnd alle oren nachkomen eyne guthe thonne hering. uff den nehisten sente purificationis marie tag noch dato disses briues jerlichen an vnser Stat Borne vnd an alle vnsern gutern dy wir haben adir gewynnen mochten vnd haben on dy vorkoufft vnd gegeben vor funffezig gute nuwe schog groschen rechter ganghafftiger landwere dy sy vns denne wol zu dangke beezalt vnd wir dy vorder in vnser stad merglichen nutz gewant haben Sulche ob geschrebene thonne heringis Gereden vnd geloben wir obgemelten Burgermeister vnd Ratmanne den vorgnten herren vnd brudern vnd allen oren nochkommen alle jar ierlichen in or closter gein Czitz zu antworten vnd czu reichen uff die gnte tageczit ane hindernifs vnd ane allis geuerde dor an vns denne glich nicht hindern noch benemen sal keyn schutz were noch behelf geistliches adir werldlichs gericht. Auch worden wir an der benampten thonnen heringes sumig vnd uff dy gute tageczit nicht beezalten Wu sie denne or vorstehir kouffte vnd awfs-gewunne so gereden wir sy gutlichen zu beezalen mit allem moglichen schaden das deme Convent wol sal genugen Ouch so haben vns dy obgeschreb. herren vnd brudere vor sich vnd alle ore nochkommelinge solliche frundschaft vnd gunst gethan So das wir adir vnser noch-komen dy obbenimpte tonne Heringis mogin widder von in adir iren nochkomen abekouffen wen vns adir vnser nochkomen das ebin sinlich fugsam vnd beqweme ist So das wir inn den Widderkauff eyn vertiljar vorkundigen vnd uff sagen sollen vnd wen denne dy uff sagunge von vns geschen ist So gereden und globen wir vorgnter Burgermeister vnd Rad-manne adir vnser nochkomen sollichen widderkouff der houptsummen mit der thonnen hering. zu beezalen vor eynem Sitzenden Rate der Stat Czitz vnd in geinwertigkeit des gardians vnd des vorstehers des gnten closters wer dy syn werden also das der gemelte radt mit wissen des gardians vnd des vorstehers solliche Summe geldes ane eyne ander Stat legen vnd solliche thonne heringis testament widder kouffen mogen das die uff ewig-keit zu deme Convent des closters zu Czitz kume vnd do hen gereicht werden sal. Des . . . Thusent vierhundert in dem nuenvndefunffezigsten jare am mantage nach sente mathien tage des heiligen zwelfboten adir den mantag nach oculi genannt.

1460.

Gut geschrieben, 3 Siegel erhalten, 1 fehlt.

[26.] In deme Namen der hochwerdigisten heiligen dreyvaldigkeit | gottis des vaters | des sons | vnd des heiligen geists amen. Noch awfsagunge der ewigen vngeschaffenen heiligen Wiesheit in beflisunge des spruchs des werden heiligen propheten ern davidis | pflichtig ist eyn itzlich geist den herren zu loben vil abir vorder eyne itzliche vornufftige creature der got zu fusse gevnderteniget hat alle creaturen geburlicher verbunden ist deme herren ere vnd heil zu zu fugen vnd zu allen geczitten syn lob zu meren Hir-ymb Ernwerdiger in goth vater gnediger lieber herre | bitten Ich Reynhard vnd Thime von Kitzscher gebrudere | gunther von Kitzscher vnser vetter mit Ern gorgen huge vnsm Caplan vnd Spittalmeistere | uwere veterliche gnade demuttiglichin wissen wy des von sunderlicher zuflucht schigkunge vnd fugunge gottis des Almechtigen | die werdige Erbare vnd Erfsame Sampnunge der Bruderschaft der kalenden zu Borne vns obgnten vllissig vnd vmb gottis willen | vnd mehir wen eyns gebetin haben vmb gunst irer kalenden begengnisse zu allen wigfasten vnd drissigisten | auch stat eyns altars zu stifften | vnd wyvil sy der zunoddorfft zu iren begengnissen bedorffen werden on in deme Spittal zu Borne zu sente Gorgen zu gunnen | doch vnsern vorigen lehin ane schaden | Do von gnediger lieber herre | gunnen wir itzunt gnten gebrudere vnd vettere vnd vnser gnter capplan | vor vns vnd alle vnser nochkommende itzunt nw vnd hinne vorder zu ewigen geczitten der gemeldten bruderschaft der Kalende zu Borne itzunt synde vnd zu ewigen geczitten werdende mit allen nochvolgenden vnwidderrufflichen lehin stat gunst vnd willen | ganteze volkommene macht vnd erlobunge aller irer begengnisse altar vnde altaria zu allir irer notdorfft vnd

was dy gnte Bruderschaft gottis ere an gebwde (?) adir wyman die im besten erdengen werde | auch wy die namen haben moge. fugen mogen gotte deme Almechtigen | marien syner gebenedietten muter vnd allen gottis heiligen zu lobe vnd zu eren | auch allen gloubigen vnd enelenden selen vnd besundern der vnser geslechte der von kitzscher | vnser vorfarn eldern vnd Aldeldern vnd alle vnser nochkommenden selen | zu troste vnd steter vorbittungen in allen iren begengnissen das sy vns denne das also zu halden alle semplichin mit hande vnd munde vor sich vnd alle ire nochkommende gelobeth vnd gereth haben | Dadurch gnediger herre Bitten wir demuttiglichin allesamt obgnt uwer Erwerdige veterliche vnd furstliche gnade | mit aller geburlicher vnderthenikeit vnd vmb gottis willen der obgnten bruderschaft vnd kalenden zu Borne vmb merungen willen gottis dinstes obingemeldet gnediglichin auch gunnen | zugeben vnde gestaten uff das solliche gottis dinst vnd Innigkeite | marien der werden mutter lob. aller heiligen ere. vnd aller gloubigen selen vorbethe ye vorder von tage zu tagen gemert werde wollen wir alleczit demuttiglichin gerne vmb uwere furstliche gnade vnvordrussen vnd mit willen vordinen vnd gotte den allmechtigen vmb uwer veterlichen gnaden selligkeit vnde langleben vlfisiglichin bitten | Der aller obgnten stugke vnd artigkille zu stetem bekentenisse vnd sicherheit haben wir obgnten gebrudere vnser vetter vnd auch der gnte vnser capplan vnd Spittalmeister | eyn itzlicher syn Insigil. vor sich. vnd alle vnfre Erbin vnd nachkommenden vnde an dissen offinbriff gehalten Gegeben noch Cristi vnser heiligen herren geborte Thusenth vierhundert im sechzigisten jare am fritage sente Nicolai abinde des heiligen Bischoffs vnd grosen getruwen notdhelffers.

* 1461.

Stadtbuch, pag. 26 a. Kalenden Altar.

[27.] In dem namen Gotis vnfsis liebn Herrn vnd cristi vnd der heiligen gebenedieten dreyvaldigkeit amen In ezu ewigem lobe marian der werden juncfrawen allen hymlichen Heren zcu eren vnde allen gleubigen selen zcu Troste Thuen kunth wir nachgeschr. Gewsorne Burgermystere vnd Ratmane nemlichen (3 Räte u. 3 Bürgermeister) vnd dy ganzeyne gemeyne rich vnd arm der Stat zcu Borne vnd Bekennen alle semplichen in diesm vnsm offinbrieffe Nachdem also dy wirdige Bruderschaft der kalenda zcu Borne Irer kalenden begencknisse vigilien vnd messen in dem Spittal zcu Sente jorgen vor der Stat gelegith haben dy zcu begehnde nach irer gewonheith vnd ufsatzunge darczu erhebunge eyns nawen altars ye dy nach zewn messen vor das erste zcuhalten angericht vnd wy vil sie der ernachmals geschigken mogen Gunst gnade vnde bestetigunge vnfsis gnedigen herrn Ern Johannssen Bisschoffs zcu Meriseburgk erworben haben vnd vns sulche nawe lehn des nawen altars in irer bestetigunge uff vnser Rathufs geeeygent vorschrebn vnd vnwidderrufflichen gegeben Des auch besundern vns iren vorsigilten brieff darobir geantwurt vnd obir gereicht In gnanten lehn von vnsm Burgermyster itzundt sitzende vnd hernachmals allen nachkommenden zekunfftigen Burgermystern von welchen sich irgen wirt dy zcu thunde eynen prister der der kalend mitbruder ist dy messen zcuvorweisen vor welchen dy meynste meinunge der Brudere Beten worden also vffte sich das in nach zekunfftigen gecziten wirdit vorkommen Darwidder wir obgenanten Burgermystere Ratmanne vnd dy gantze gemeyne zcu Borne vns ewiglichen vorheyschen haben Bereden vnd yoworten incrafft diess brieffs vor vns vnd alle vnse nachkomelinge dem prister vnd vorwesere des nawen altars itzundt vnd allen ernach kommenden altristen alle jar vnde ewiglichen ein naw schog grosschen lantweriger vnd genger montz von vnsem Rathufs zcu reichen vff zewo tage cziit nemlichn vff sente Johannes des heyligen towffers tag schirst komende dy helffte vnd dy andir helffte darnach vff wynachten nehst darnach folgende vnd furder so von eyne tage uff den andern folgend also obin berurth ist Darumb ich obin gemelter Matthis arnolt dy czijth Burgermyster von amptiswegen in geinwertigkeit myner kompan des Rats vnd der andr zweyer rethe dem Erfsamen andechtigen Ern paule adam nach vorbethe syner bruder der kalenda sollichen nawen angehoben bestetigitten altar

geligen haben nach vorschreibung der gnanten bruderschaft obin berurth Worden wir aber an sullcher bezalung zcu irkeyner tagezeit sumig werden vnde bynnen VIII tagen nach vormanunge des altristen nicht bezalung thun So das er mit gerichtsbrieffen vnd nachzerunge darczu bringen muoste was er dann moglichen schaden daruff gethan hette den gereden wir im vor vns vnd alle vnser nochkomlinge mitsampt dem hauptzinfse gantz gutlichen zcu bezalen ane arg vnde geuerde vnd wollen dis synen schlechten wortn an alle irweisung glouben Auch ob diessr brieff an sigille zcu breche adir an schriftt vorbliche adir vormackelt zcu ryssen adir zcustochen wurde adir ob ihts zcu kortz adir zcu lang an silben wortn adir artikeln geschr. were das sal allis an der bezalunge des ewigen jerlichen schogks zcinfz keynen schaden brengen nach fugen Worde auch diessr vnser offinbrieff vorlorn adir vordirte adir sust in noten wy dy namen hetten vorwarnlost vnd vmbracht so gereden wir obgnten Burgermyster Rethe vnd gantze gemeyne vor vns vnd vnser nachkommen eynen andern sulchen brieff vorsigilt an als geuerde vnd arg widder zeugeben Solliche alle obgnte stucke vnd artikele dieß vnser vffinbrieffs gereden wir vil obgnten Burgermyster Ratman vnd gantz gemeyne rich vnd arm vor vns vnd alle vnser nachkomende by vnsern guten waren wortn trawen vnde glauben gantz stete vnd feste ane als arg vnd geferde zcu halten Gegeben nach Cristi jhesu vnsern hern geborth Thawsendt vierhundert in dem eynvndesechzigisten jaren mit vnsern grossen anhangenden vnd der gnanten kalenden Sigillen.

1463.

mit erhaltenem Stadtsiegel.

[28.] Wir hanns Brethsnyder Burgermester Jacoff Schibe Hans Kretzeschmar Donat Citzer Nickel kraczt Hans metzschener merten iofst vnnnd michael pretezschele gesworne Ratmanne des itzunt sitzenden Rats Mathias arnold Burgermeister Clemens Brethsnyder Nickel schreie hans rosenhayn Heinze Ochlichen Gorge Hinckelman Bastian Nuwmann vnde Mathis flegk Rathmanne des andern Rats Nicolaus Kraczt Burgermeister Hans Ritter Paul schuster Hans von Borne Paul Breme Sthepphan Brunßdorff Caspar kofsil vnd lorenz schreie Rathmanne des dritten Rats Die ganteze gemeyne Reich vnd arm ald vnd jungk der Stad Borne Bekennen eyntrechlichen vnd semplichen vor vns vnd alle vnser Nachkommen vnd thun kundt in dissem vnserm offinbriue vor alle den die yn sehn ader horen lesen das wir mit wol bedachtem mute vnd eyntrechtigen Rathe recht vnd redelichen vnd ane argk vorkoufft habin vnd vorkouffin mit vnd inkraft disses briues uff vnserm Rathhuse an vnsern Renthen Czinsin gutern vnd czugehorungen wie wir die habin adder ernochmals gewynnen mochten nichtis aufsgelossin der werdigen Calenden kalenth brudern vnd iren kammermeistern zcu Borne vnd allen yren nachkommen eyne guthe thonne Heringes uff den nehsten Sente purificationis marien tagk nach datum disses briues jerlichen an vnser Stad Borne vnd an allen vnsern gutern die wir haben ader gewynnen mochten Die denn die werdigen hern Er jacoff bierschroter Er nicolaus schuwert mit hulffe etzlicher juniger luthen den kalenden vnd yren kamermeistern habin zcu geeygenth vnnnd wir habin yn die vorkoufft vnnnd gegeben vor funffzig guthe nuwe schogk grosschen rechter gangkhafftiger landtwere die sie vns denn wol zeudancke bezalt habin vnd wir die forder yn vnser stad mergklichen nutz gewand habin | Sulche obingeschrebin thunne Heringis Geredin vnd globen wir obin gemeltin burgermeister vnd Radtmann der stad Borne der vorgenannten Calenden kalenth Brudern vnd yren kammermeistern vnd alle yren nachkommen den alle jar jerlichen yn yre Calenden den kammermeistern zcu antworten vnd zcu rechin uff die gnante czeit ane hindernis vnd ane allis geferde dar an vns denne glich nichtis hindern nach benemen sal kein schutz were noch behelf geistelichs ader wertlichis gerichtis Ouch wurden wir an der gnanten thunnen heringis sumigk vnd uff die berurte czeit nicht bezalten wo sie dann die kalende adder yre kamermeister koufften vnd ufsgewonnen So geredin wir sie gutelichin zcu bezalin mit allim moglichen schaden das den Kalenden

vnd yren Kammermeistern wol sal genugen Ouch so habin vns die obgeschrebin kalenden vnd yre kammermeister vor sich vnd alle yre nochkomelinge sulche fruntschafft vnd gunst gethan So das wir adder vnser nachkommenden die obinbenante thonne heringis mogin widder von yn adder yren nachkommenden obkouffin wenn vns adder vnnser nachkommenden das ebin sinlich fugfsam vnd beqweme ist So das wir yn den widderkouff eyn virtel jar vorkundigen vnd ufsagen sullin vnd wenn denn die ufsagunge von vns geschen ist So geredin vnd globin wir vorgnten Burgermeistern vnd Rathmann der stad Borne adder vnnser nachkommenden sulichen widderkouff der houbtsummen mit der thunnen heringis zeu bezalin der kalenden Calenth brudrn vnd yren kammermeistern in der stad czu Borne wer die seyn werdin Also das die kalende kaland bruder adder kammermeister sulch geld in eyne ewige messe wendin sullen das do uff ewige czit zeu der kalenden sulche messe gehalten werde von der obingnanten summa geldis ane hindernifs vnd an allis geferde Des czu sicherm vnd warm bekentenifs haben wir obgenanten Burgermeistere Rathmanne vnd Ganteze gemeyne vnnser stad Borne insigil mit gutem wissen vnd willen vndene an dissen offendenden vnnsern bryff lasen hengen Gegeben noch Cristi vnnsers herrn gotes geborte Thusent vierhundert im deme dreyen vnd sechzigisten jare am montage nach barbare der heiligen jungfrauen.

* 1465.

Stadtbuch pag. 93 a.

[29.] Anno domini M^oCCCC^oLXV^o feria secunda sanctorum Ebdon et sennes Reverendus pater Nicolaus millensis episcopus. istud altare consecravit in honorem sancti Georgii martyris et in honorem sanctissimae sanctae Eternae Sapientiae. nec non in honore inventionis pueri videlicet salvatoris nostri. in honore spineae coronae. lanceae et clavorum domini in honore sancti Jacobi | apostoli sancti Christofori martyris | sancti Licinii martyris | sanctorum fabiani ac sebastiani | sanctae Annae matyris mariae | sanctae Magdalenae Mariae sanctae marthae hospitae domini | et sanctae Catharinae virginis et idem episcopus et pater instituit dedicationem altaris dominica proxima post festum sancti Martini episcopi ut ab antiquo habita est. deditque indulgentias omnibus contritis et confessis advenientibus in quolibet festo praedictorum ac dictarum patronorum ac patronarum. ac omnium aliorum festorum maiorum videlicet pasce pentecost. Nativitatis christi et per totas octavas eiusdem simile in omnibus festinutibus virginis gloriosae praecipue exaltationis ac inventionis sanctae crucis ascensionis bona quinta et sexta feriis ac sabbato pasce | ac per totam octavam corporis christi et praecipue primum opus ad fabricam porrigentibus totiens quotiens ac singulis diebus praenotatis ac in die sancti dominici XL dies mortalium et tot. venialium criminum remissionem in domino misericorditer relaxavit.

[30.] eod. anno. Item dominus johannes Endener antiquus rector hospitalis et antecessor domini georgii hugis remisit eodem domino georgio huge et omnibus successoribus duas vacas perpetue in hospitali servandas | quod idem georgius hug libere et sponte coram consulatibus professus est | et ergo si per aliquem rectorem hospitalis venderentur vel mactarentur vel quomsmo (?) abirent tunc aliae (!) in locum darent constitui.

1468. (Siegel verloren.)

[31.] Tilo dei et apostolicae sedis gratia Episcopus ecclesiae Merseburgensis Universis et singulis Christi fidelibus praesentes literas nostras inspecturis Salutem in domino sempiternam ac praesentibus fidem in dubiam adhibere | Literas bonae memoriae quondam domini Johannis Episcopi Merseburgensis praedecessoris nostri nobis proparte devotorum nostrorum fratrum kalendarum in Bornis nostrae diocesis sanas et integras non vitiatas non cancellatas non abolitas nec in aliqua sui parte suspectas atque omni prorsus vitio et suspicione carentes praesentatas recepimus Quarum literarum tenor sic incipit Johannes dei et apostolicae sedis gratia Episcopus Merseburgensis universis et singulis christifidelibus praesentes nostras

litteras visuris salutem in domino sempiternam Quia sancti patres non sine causa etc. Et sic finitur Datum et actum in curia nostra Episcopali Merfseburgensi sub anno domini millesimo quadringentesimo sexagesimo primo feria secunda post octavas Corporis Christi Nobisque pro parte eorundem fratrum kalendarum in Bornis exstitit cum debita instantia supplicatum Quatenus huiusmodi fraternitatem et litteras praedecessoris nostri confirmare et auctorizare dignaremur Nos igitur Tilo Episcopus memoratus Cupientes cultum divinum ac alia bona opera pietatis prout nobis ex iniuncto incumbit officio pastoralis ampliare gregemque nobis commissum ad devotiones incitare ac quantum possumus saluti animarum salubrius providere Examinatisque memoratis literis diligenter et mature Habitisque deliberationibus super in eisdem contentis et quia reperimus omnia et singula in dictis literis contenta rationabilia fore Supplicationi dictorum fratrum kalendarum favorabiliter annuentes dictas litteras praedecessoris nostri memorati ac in eis contenta dictamque fraternitatem kalendarum in Bornis approbamus ratificamus et confirmamus dei nomine in his scriptis In quorum omnium et singulorum fidem et testimonium praemissorum Sigillum nostrum praesentibus est appensum Datum Merfs. sub anno a Nativitate domini Millesimo quadringentesimo sexagesimo octavo feria sexta post festum assumptionis Mariae virginis gloriosissimae.

1469.

Siegel erhalten.

[32.] Wir von gotis gnaden Ernst des heiligen Romischen Reichs Ertzmarschalch kurfurst | vnd Albrecht gebruder hertzogen zeu Sachsen Lantgrafen in doringen maregrafen zeu miessenn Bekennen vor vns vnsre erben vnd nochkomen vnd thun kund mit difsem briue gein ydermenniglich Noch dem der Rat vnd Stat Borne vff ein | vnd mertin von der Gane uff dem andern teil vnser lieber getruwer in irrung gewest sind etzlicher wasserlouffte | von wegen der Topfer | von wegen Bruwens | auch etzlicher wege czu iren gutern vnd von wegen schenckens fremde Biers in dem dorffe Tragis das eynteil vnser | vnd einteil mertin von der Gane ist | zeu solcher obgemelter beider partt gebrechen | wir die Gestrengen vesten Ern Casparn von Schonberg Ritter Nickeln pflug amptman zeu liptzk vnd Hansen Trupitz Burgermeister doselbst vnsre Rete amptlute vnd lieben getruwen von vnser vnd der vnser wegen von Borne doselbst gein Borne geschickt vnd gefertigt haben | des gleichen mertin von der gane von sien vnd der sinen wegen vnd von des dorffs Tragis die ouch eynsteils vns wie obgemelt sind vnd ouch irschynen | Also haben vnser Rete vnd amptlute obgerurt | von vnsern wegen solche obgemelte gebrechen vnd irrung von allen teylen gnuglichen gehort gesehen | vnd vornomen vnd sich an allen teylen geflissigt vnd gemuhet | das sie von allen teylen solche ire irrung | vnd gebrechen gewilligt vnd mechtiglichen an alle vnderscheit vnd widerrede uff uns gegeben | vnd gestalt haben sie gutlichen zeu entscheiden | also haben wir sie gescheiden vnd scheiden sie yn vnd mit krafft vnser schides geinwertiglichen Nemlichen das die wasserlouffte von beyden teylen sollen gehalten werden als die vor alder gegangen vnd gelouffen haben vnd gehalten worden sind | vnd der wege czu iren gutern gebrechen | auch als vor alder gescheen ist Die topfer die itzundt in der stat wonen sollen hinfur Mertin von der Gane sinen erben vnd nochkomen keynen zcinfs geben | doch so sollen der nicht meh ir yn die stat Borne zcihen sundern vor der stat bliben vnd wonen | vnd die topfer itczundt in der stat wonende | wenn die vorsterben ader sust wegk zeyhen | dor noch sal keyner meh ir yn der stat uffgenommen werden | des bruwehusses sollen der Rat vnd Stat zeu Borne Mertin von der Gane als eym andern vorgonnen zeu Bruwen in maszen als er vorgebruwen had So sal mertin von der Gane on widder vorgonnen vff sinen gutern die roren in die stat zeu legen als die itczundt legen Vmb das dorff Tragis das eynsteyls vns vnde eynsteyls Mertin von der Gane ist dorvmb sich die von Born mit dem kretzschmar sins fremden bier schenckens halben geirret vnd dem Kretzschmar ein valß bieres zeu hauwen haben Er-

findet es sich das das dorff tragis usz der miele gelegen ist so sal vnnd mag hinfur der Kretzschmar doselbst fremde bier noch sinem willen vnd gefallen ane der von borne vorhinderunge wol schencken Ist aber das dorff Tragis in der mile gelegen | so sal sich der Kretzschmar do selbist halden also andire Kretzschmar dy auch in der mile gelegen sind vnd wen der gnante Kretzschmar mit bier vnd andern vnser geleit ruret | so sal er solch geleite | davon denen gein Borne reichen | vnd gebin Vnde Mertin von der Gane ader sine Erben sollen die selbigen die yn den Kretzschmar wie obin gemelt gefallen sind ader das czu thun geholffen haben nicht Beteidigen adder derhalbin dor vmb beschedigen noch keyns argen czu yn gewarten | Sunder was vnfsir amptmann czu liptczk vmb solchen gewalt vnd freuel czwischen Mertin von der Gane vnd den vnfsn vnd den sinen zcu Tragis sprechen wirdet dabie sal es bliiben | vnd sollen aller stugk do mit gericht sin vnd bliiben ane geverde zcu orkunde vnd steter haldung haben wir disser Schydisbrieffe czwen glichs lauts gemacht vnnd itzlichem teyle eynen sich dor noch zcu richten mit vnfsirs herczogen Ernsts anhangenden Insigil defs wir herczog albrecht mit hirczu gebrochen vorsigilt gegebin Gescheen czu miessen am Sontag noch petri et pauli der heiligen aposteln tag noch Cristi vnfsirs herrn geburt Tusennt vierhundert vnd im nunvnde-sechzigisten jarem.¹⁾

1470. Siegel in Resten erhalten.

[33.] Wir von gottis gnaden Ernst . . . vnnd Albrecht gebrudere . . . Bekennen . . . das vnns der Rath czu Borne vnnsrer lieben getruwen vonn yren vnnd der ganntzen gemeyne wegen . . . zcu erkennen gegebenn habin wie yn vonn etzlichen Kretzschmar vnd mit vifbringunge nuwer Schenckstete auch vonn allerley hantwerkenn die sich bynnen eyner meyen wegis in den dorffern vmb borne nidder gesetzt habin vnnd aldo ire hantwerk trybn den hantwegkernn burgern vnd inwonern doselbist zcu Borne | nicht cleyne gedrencknifs schedenn vnd abbruch zeugefuget vnd gethan werden vnns auch dorbey ir armuth vnnd grosse schuld dorynne die Statt heertzoghalben die yre vorfarn vnd sie vnnsern vorfarn vnd vnnsern vater loblicher gedechtnifs in Behmen vnnd anderswohin offtmals scheynbarlich gethan auch scheden die sie durch fewers nott offte geliden vnd genomen haben ertzalt vnd in demutigem vleys flehlichen gebetten die selbe vnnsrer Statt vnnd die inwoner doselbist gnediglich czu bedencken vnd mit sunderlichen gnaden vnd fryheytn czuvorsehen dodurch die selbe vnnsrer Statt in bessern Stant | enthalt vnd gedyen brocht mochte werdn haben wir der egenanten des Rats zcu Borne vlyssige vnd demutige bete auch getrewe vnnd anneme dinste So ire furfarn vnd sie vnnsern herren vnd vater obir-eldernn vnd furfarn loblichr gedechtnifs auch vnns selbs gethon haben czukunfftiglich thun sollin vnnd mogin ouch ire notoriff vnnd billikeyt der dinge so sie bitten angesehen vnd vonn bsundern vnnsern gnaden soliche fryheyte gegebin vnd Gebin yn soliche gnade vnnd fryheyte geinwertiglichen vnd gnediglichen von vnnsrer furstlichen wirde vnd machte in vnd mit krafft ditzs briffs in solichen stucken vnd artigkeln inmossen ernoch geschribn stehin zcu dem ersten setzen vnd orden wir das hinforder vmb Borne in eyner mylen wegis allsweyt die mylen gemeynlichen vff alle seiten genannt vnd geacht sind keyn kretzschmar noch Schengkstatt in der pflege vber jare ander noch frembde Bier denn Bornisch Bier furen noch schengken sollin vffgeschlossenn von Sant Johannis tag baptiste Bifs uff Sant Michels tag die zeyt vber vndforder nicht mogin sie frembde Bier schengkn Es mogin auch die Erbkretzschmar die vor alders gebrewett habin selbs Brewen | awer die new vffgebrochten Schenckstete sollin hinforder keyn Brewen thun widder wenig noch fil Es sal auch keyn hantwegker Schwster noch Schnyder leyneweber Begker Fleyschhawr vnnd ander der gleych Bynnen dry mylen wegis vmb Borne gesessen keyn hantwegk uben noch tryben Sunder die gantz abstellen awffgeschlossenn Schmede dy man vmb arbtunge des

¹⁾ In zwei Exemplaren vorhanden, vielleicht beim Kauf mit ins Stadtarchiv gekommen, oder, weil in der einen Urkunde etwas korrigiert, neu hergestellt?

Ackerwergks also weyt nicht emperen magk Es sal auch in dem allem dy eynigunge vnd beteidigunge zewischen hannse von konritz der seinenhalben zcu lobeschitz vnd den egenanten Rate vnd gemeyne Stat Borne gescheen unvorrugkt vnd vnvorkurtzt blyben | vnd der sal hirmit keyn abbruch gescheen also auch der genanten vnser statt Borne awfs aldem herkomen mit der amptlewte wfsen von langst bilsher von alln waynen die yn ader durch die egenante vnser statt gefaren Centnergut getreyde schindel adder bawholtz gefuret dryheller zcu weggelde genomen haben | wir yn solich herkomen vnd gerechtikeyt awfs rechtem wfsen confirmiret vnd bestetiget Confirmiren vnd bestetigen vorschryben yn auch soliche hirmit das sy hinfur zcu ewigen zceyten soliche drey heller von den obgerurten waynen die Centnergut getreyde schinder vnd buwe holtez in adder durch furen zcu wege gelde nemen vnd thun yn dorobbir die sunderliche gnade das sy darczu vonn eynem ytzlichen holtezwayne der yn adder durch die Statt Born gefurt wirdet ein pfennig zcu wegegelde fordern vnd das man yn den pfennig dovon zcu wege gelde zcu gebin schuldig sal seyn sie sind inwendig adder ufwendig der pflege Borne domitt die burger der egenanten vnser Statt dy wege awfs vnd yn zcu faren in wefsen halden mogin doch awfgeschlossen was getreyde hineyn zeuorkeyffen gefurt Dovon darff man solliche dryheller wegegeldes nicht gebin wann man abir das getreyde durch weg furen wurde sal man das obgerurt wegegelt dovon zcu gebin schuldig sein vnd uff das den genanten vnsern burgern vnd inwonern vnd iren nochkomen vnser Statt zcu Borne solich obingemelte begnadunge geschefte satzung vnd ordnung in allen yren artickeln stete veste vnd vnvorbrochenlich gehaldin sollin werden Gepieten wir hirmit allenn vnnsern amptlewten zcu Borne dy itzund aldo sein adder zcu kunfftiglich aldo sein werdin den Rat vnd Gemeyne zcu Borne by solicher vnser begnadunge vnd befryhunge vff ir irsuchen an vnser Statt zcu hanthaben zcu schutzen vnd zcu beschirmen Dodurch sie vonn den vmbliegenden Kretzschmarn vnd handtwercken nicht beswert sunder yn soliche befryhunge vnd gnade gewrelich vnvorbrochn gehalden werde vnd ob ymands dowidder thun vnd sich daran nicht keren wurde wollit solichs so ir von dem Rate zcu Borne dorvmb irsucht vnd angerufft wirdet an vnnser Statt weren vnd in keyne weyfe gestatten Das ist vnnser ernste Meynung hiebey sint gewest vnd gezewgen vnser Rete vnd liebenn getruwen Hugolt vonn Slinicz Obermarschalck Er Dittrich vndermarschalck Er Caspar von Schonberg Ritter Doctor Johannes Scheybe Canzler Nickel pflugk zcu leyptzik vnd Borne amptman vnd ander vnnser mann vnd diener gnug glawbwirdiger Zcu vrkunde habenn wir hertzog Ernst vnnser Majestat Insigell hirvnden wissentlich thun hengen das wir hertzog Albrecht hirzcu mit gebruchenn geben zcu Dresden noch gottes geburt virczehin hundert darnoch im sibenzigisten jare frytag noch lucie.

1475.

[34.] Vonn gots gnadenn wir Ernst . . . vnd Albrecht gebrudere . . . Bekennen . . . das wir vmb vlissiger demutiger Bete auch williger annemer dinst willen So vns vnser liben getruwen der Rat vnser stadt Born oft gethan hat, sie vnd yre Nachkomen noch thun sollen der egnten vnser stadt Born die sunderlich gnade vbir andre vnser befryhunge in noch innhalt vnser briues mit vnsermajestat insigell Besigelt gegeben gethan das man an keynem ende bynnen eyner mylen wegefs vmb die gnte vnser stadt | ane zcu lobeschitz das itzt hanse vonn konritz zcu stehet | gastunge haben noch halden solle als sie solliche befryhunge vormals von vnsern lieben herrn vnd vater loblicher gedechtnis gehabt haben Geben yn sollich obgerurt befryhunge hirmit geinwertiglich in vnd mit crafft ditzs briues truwelich vnnnd anegeuerde Allen vnd itzlichen vnsern voyten gleitzluten vnd amptluten die itzt aldo sein adder ernoeh komen werden Ernstlich gebieten sie bey sollicher vnser begnadunge vnd befryhunge Zcu hanthaben zcu schutzen vnd zeu vorteidigen also oft yn das not sein wirdet doran geschiet vns wol zcu dancke | mit vrkunde ditzs briues mit vnserm hertzogenn Ernsts anhangenden Insigell das wir hertzog Albrecht hirezu mit gebruchenn besigelt vnnnd gegebenn zcu liptze am Sonnabenndt nach assumpciois virginis marie noch gotis geburt virczehin hundert darnach im funffvndszigisten jaren.

1478.

Mit 1 anhangendem, nicht gut erhaltenem Siegel, 2 verloren.

[35.] Wir Steffanus vonn Gots vnnde des heylighnn Romischnn Stuls gnadenn apt Matthias Jhenichenn prior Johannes Rephun Custus Nicolaus Lingental cantor Lampertus kwchenmeister vnnde dy gancze sampunge des gestifttes vnnde Closters zu peghaw Sancti benedicti ordens Merlseburgks Bisthums Bekennen vor vnns vnnde alle vnnser nochkommen Eyntrechtlichnn Inn dyssem vnnserm offinbriue Noch dem als wir manchfeldichlichnn irsucht syndt dy begenckenifs der kalenden inn vnnfser kirchnn Sancte Marie zcu Bornne dy begencknifs der selbighnn bruderschafft zcu begende zcu allen geczeythin wenn sich daz begibt denn vorstorbenn zellenn zcu sellikeyt denn lebendnn zcuesserunge irs lebens zcu vorgonnenn Hobenn wir angesehnn sulche ore vlifsige bethe auch vnnfser eyghnn zelenn selickeyt vmb merunge willenn gotis dinst vnnde seyner werdn gebenedeythnn mutter vnnde habnn inn gutenn willenn vor vns vnnser Nochkommen vnnde vnwidderprechlichnn zcu gegeben denn gnantenn brudernnn vnd irenn Nochkomelinghnn suche ire begencknifs inn der vor bemelthnn kirchnn zcu hobin vnnde zcu begynn gotis dinst darynnenn zcu merenn vnnde zcu thun Szo vill sy der ynn dy bemelthnn kirchnn bryngynn moghnn doch also eynnem probst ader vor wesser der kirchnn anne schadin vnnde vngeirreth vnnde vngehnderth szo her ander begencknifs zcu seyner nottdorffth gebrauchnn mwsthe Szo aber dy vorgeanthe Bruderschafft ire begencknifs inn der bestymthnn kirchnn haldenn Es sey zcu den vier Quatuortemperenn Adir sust vorsterbens halbenn brudernnn ader swesternnn aufs der kalende ader daz dreyfsigste darynnen habenn wurdenn szo sall das oppfer gantz vnnde gar folghnn eynnem probst ader vorwesser vnnde eynn probst ader vorwesser der kirchnn mith seynenn herrn zcu der vigilienn seynn vnnde mit seynenn Herrnn messe haldnn vff denn obenth zcu der collacione vff denn morghnn mith seynenn herrn Schulmeisternnn vnnde kirchnernnn gehenn welcher adir bey der vigilienn vnder denn bristernnn nicht wurde seynn vnnde des morgens messe nicht hylde der sal abenth vnnde morghnn zcu tichsche nicht gehenn Auch sall dy kalende ynn der bestymthnn kirchnn alle wochnn czw messenn bestellenn ader also vill sy der dareynn brenghnn moghnn vngehnderth vff welchem altar daz bequem ist vnnde onn bezzeygeth wirth eynnem probst adir vorwesser anschadnn der selbige prister der dy selbighnn kalendnn messenn darynne haldin wirt itzunth ader czu voryngem geczeythnn sal eynn probst ader vorwesser der kirchnn szo efs noth seynn worde mith seynn messen beyschanth thun vnnde wafs ym sust vnderlanck vff denn altar geopffherth wirth Eynnem brobst adir vorwesser dafs bitwthnn (?) do durch dafs daz also gehaldnn werde Habenn wir obgenanther steffanus apt zcu peghaw vnnfser Epthey Sigill wyssenthlichnn ann dyssenn offennbriue gehanghnn mith vnnfers Cappytels darnebenn vnnde der kalende Sigill darbey zcu stether haldunge geschehnn der geschribenn vnnde gegeben ist Noch cristi geborth Tausenth vierhunderth vnnde darnoch ynn dem achtvndsibenzigstenn jar am abenth calixti pape.

1479.

Das Abteisiegel fehlt, Flecks Siegel erhalten.

[36.] Ich Mathis fleck zcu Bornne Mitburger Bekenne . . . das ich . . . mit gonst vnd volworth deis gnedighenn herrn Ern Steffann von gots gnadenn Apt zcu peghaw meyns noch geschrybenn guts Lehenherrn . . . vorkawfft hab vnde vorkewff . . . Dem wirdighenn Herrn Johann ottonis vicarienn der Thumkirchenn zcu merlsburgk . . . Sechgs gute volwichtige Reynische guldenn jerlicher tzins ann meynnen gutternnn Nemlichenn ann dreyenn huffenn dy man neneth dy quentenn huffen geleghenn by dem Eggelsche als man zcuwget vff lobisschitz vnde an vihr wyfsenn auch genaenth dy quenten wyfsn geleghenn bey apistorff von meyn obgtennn herren von peghaw zcu lehenn Rurende vnnde ann allen andernnn gutternnn . . . vnnde hab vmb dy gegeben vor Newntzigk gute volwichtige Reynische guldenn dy er mir zcu guter genwge betzalt hat . . . Sulche sechgs Reynische guldenn tzins

Gered vnnde gelob ich genanter vorkewffer dem gntenn hernn ader Inhabernn dyßes briffs alle jar jerlichenn zcu betzallen vff tzwu tagzeydt des jarß Nemlichenn vff senthe iocuffstagk nehst nochkommede drey reynische guldenn vnnde vff vnnser liebenn frawen tag lichtmeßs hir noch folgende . . . Auch hat mir der obgnte kewffer sulche gonst gethann daz ich . . . sulche sechßs Reynische guldenn wenn vns dafs ebenth wydder abkauffen . . . vnnde wir Steffanus von gots gnaden apt zcu pghaw Bekennen . . . dafs sulch kauff obinbemelh mit vnnserm willen . . . gescheenn ist . . . (1479) am tag dorathee der Heylighenn Junckfrawn.

1482.

Siegel erhalten.

[37.] Von gots gnaden wir Ernnt des Heiligen Romischen Reichs Erzmarschalh kurfurste vnd Albrecht gebrudere herczogen zu Sachssen. lantgrauen in duringen vnd marggrauen zu missen. Bekennen vor vns vnnser erben vnd thun kunt mit disem vnnserm brife vor Allermenniglich Nachdem weilant der hochgebornn furst | herre friderich herzog zu Sachssen, kurfurst etc. vnnser lieber herr vnd vater loblicher gedechtnis vnnsern lieben getrawen, dem Rat vnser Stat zu Borne die erbgericht daselbst hat lassen zusteen | vmb acht gute schog | jerlicher gult | die wile sie die inhaben vnd vorschreibung dorober gegeben | das wir vmb des gemelten Rats | vlissiger bete willen | Ine auch solch vnser Erbgerichte | vnnd darczu vnnser obergericht | in der Stat daselbst haben lassen zustehen | das sie dieselben beide gerichte in vnnser Stat vnd vor der Stat zu Borne | So ferne das von vnnsern Reten | den wir des beuehlen werden, vorlachtsteynt wirdt vnd nicht weiter innhaben | vnd als offt das not sein, gerichts ubung thun | der felle | bussen vnd inkomen davon durch irer vnd gemeyner Stat nutz vnd fromen vffs bestste konnen zu gnissen vnd zugebrauchen ane vnnser | vnnser erben vnd menniglichs vorhinderung | den trewlich vnd vlissig | mit ubung derselbigen vorzustehen, das iderman rechts gestatt vnd vorgunst, vnd nymant des gewegert | noch vorsagt werde | Vnd sullen vns von sulchen obern vnd Erbgerichten zusampne sechzehen gute schog, acht vff walpurgis vnd achte vff michaelis alle jar jerlich zu vnnser Cammer Reichen vnd bezcalen. Vff walpurgis nehstkunfftig anzuheben. alle dieweil wir vnnser erben ader | nachkommen | yn sulch vnnser ober vnd Erbgericht lassen zustehen vnd die nicht wider von ine fordern. Vnd der Rat die vor sulch Sechzehen schock jargelt haben wollen Lassen ine sulche gericht zustehen. vnd geben ine zu die vbung | der obern vnd niddern gerichte | vnd die felle dovon zu haben wie obgemelt | also geinwertiglich in vnnd mit crafft dises brifs | alles trewlich vnnd vngeuerlich. des zu vrkundt haben wir hertzog Ernnt vnnser Innsigel. des wir hertzog albrecht hirczu mit gebrochen wissentlich an disen brife lassen hengen. der geben ist zu dresden am montag felic. inpm. Nach cristi vnser herrn geburt vierzcehenhundert | vnd dornach im zweyvndachtzigsten jaren.

1482.

[38.] In dem Namen gotis amenn. Wyer Georgius vonn gots vnnd des heyligenn Romyschem Stuls gnadenn Abtt Er Matthias Jenchen prior. Er Thomas Brawer sangkmeyster. Er Johannes Rephun custos Er heyndrich von der mossell kuchenmeyster vnnd gantz Capittell Jungk vnnd alt des gestyffts sanct Iacoffs zcu Pygaw sancti Benedicti ordinis / ynn merseburgyschem byschtump gelegenn / bekennen vor vns vnnd alle vnser nachkomen yn dyssem vnsern offinbriffe vor ydermenichlich den er vorkumpt vnnd yrtzeygitt wirt Nach dem als das leben der menschen ist gantz vnsicher vergenglich vnnd vngewiß vnd der selen selikeyt nichts mehr nachvolgitt / wan alleyne was wyer hye auff erden guts thun / eyn sulchs durch eyngyßsunge gotlicher gnadenn mitt tyeffter betrachtunge zcu hertzen vnd gedanckenn genomen habenn. Der achtbar vnnd wyrdige Magister vitalis fleck doctor yn der Ertzthey / vnnd matthis fleck gebruder / vnnd ynn yren hertzen beschloßsenn gott tzu eynem ewigen lobe vnd yren selen zcu Ewiger selikeyt eyne ewige messe zcu styfftenn / vnd sint yn gesundem leychnam mitt eygener gutter vornunfft zcu vns gekommen vnd demutlich

gebethen En czuvorgonnen eyn altar zcu styfften vnnnd zcu bawen yn vnserkyrchen vnser probstey zcu Borne also habn wyer angesehn der genanten flecke gebrudere ynnikeytt / yre vnd ander fromenlewthe bethe / mit wysisen vnd wolbedachtn vorrathe vnser egnanten Capittels des vorgnanten Gotshawses zcu pygaw vnd en dye gunst vnd freyheit gegeben / eyn altar zcu styfften vnd zcu bawen yn vnser kyrchen der Probstey zcu Borne / yn der Ere vnser lieben frawen als man nenett Presentationismarie / dorezu gestyfft vnd gegeben haben dye obgenanten flecke von vyer huffen landts dye tzynse, welche vyer huffen landts von vnserm gotshawse zcu Pygaw zcu lehen rurenn vnnnd zcu lehn gehen vnd legen yn der lyste felde vnnnd sint gewest der alden greyffendorffynn / dye selbigen vyer huffenn landts wyer vnd vnser Capittell vmb merunge gotis dinstes vnnnd demutiger bethe willen der oft genanten flecke vnnnd ander fromenlewthe / gelegen habenn eynem den auff dye tzeytt der Rath zcu Borne hatt geantwortt, mitt namen genant caspar Kosell auff dye tzeytt daselbst Burgermeister vnd nach des selbigen tode so ofte des nodt wirtt / adder sich verfellet / sall der Rath zcu Borne der lehn rechte volge thun nach lantlewfftiger weyse vnd gewonheitt / vnnnd der Rath zcu Borne sall alle jar jerlichen von yrem Rathawse reichen vnnnd gebenn zcu Ewigenn getzeythenn dem altaristen syeben alde schock ganghafftiger muntze Ouch haben dye oftgnanten flecke auff dem Rathawse zcu Borne eynen gulden tzinses gekauft vmb besfserunge willen der altaris dem altaristen ouch jerlichen zcu reychen Ouch haben dye oftgenanten flecke dem Rathe zcu Borne dye gunst vnd freyheitt gethan vnd gegeben / den altar ewiglich zcu vorlyehen / also das man den sall lychen eynem wertlichen prister der eyns burgers kint ist / vnnnd dye oftgenanten flecke alle yre erben vnnnd erbnemen sullen habn zcu ewigen getzeythen dye bethe Ouch ist beredit das der altariste sall zcu Borne seyn ane vnser probstes schaden / also was em geopphirtt wurde sall er vnserm probste gebenn / bedarff seyn ouch eyn probst yn nothen eyne messe zcu syngen / dye sall der gnante altariste syngen / auff dem altar do yfs en der probst heysen wirtt / vnnnd was dem altaristen wirtt zcu dem altar bescheyden / das sall mitt willen vnnnd wisfen vnser probstis / des Rathis zcu Borne vnd des altaristen on nutz vnd fromen des altaris gewantt werden Ouch sall der altarista alle jar jerlichen dye dye geschlechte der flecke begehen halden vnd syngen eyne gantze vigilien mitt sechs mesfen drey messen syngenn vnd drey lesen / vnd sall vnserm probste alle jar geben zcu restawr funfftzen gutte groschen der besten muntze / wurde ouch der altar yn zeukunfftigen getzeythen gebesiertt antzynsen / so sall man dem probste nach sulcher antzall der tzynse dye der altar ytzo hatt das restaurum ouch besfsern / nach yrkenntnis vnser gnedign hern zcu Merfsburgk. Das . . . [1482] auff dinstagk nach divisionis apostolorum.¹⁾

* 1487.

Stadtbuch pag. 43—36.

[39.] Von gots gnaden friderich kurfurst vnd johans gebruder hertzen zu Sachsen etc.

Lieben getrawen ir mugt vernomen wie die hochgebornen fursten vnser lieben ohmen herr wilhelm der Elter herr wilhelm der mitler gebruder vnd herr wilhelm der jungst ir vetter alle landgrauen zcu hessen etc. auch vnser vetter hertzog albrecht vnd wir vnser aller eldern seligen alde gehabte vnd herbrachte verbruderung wider vornuwet doruff die selbigen vnser ohmen vnfs von allen yren grafen herrn freien Ritterschafft amptluten mannen vnde Steten Eyne nauwe erbhuldunge dorezu ouch den hochgebornen fursten vnsern liebenn ohmen vnde swager herrn johansen kurfursten, herrn friderichen vnd herrn Sigemunden gebrudern marggrauen zu brandenburg etc. vnd vns vff aller vnser vernuwete erbeynung durch alle yre amptluth eyde vnde gelobde thun haben lassen / des gleichen widervmb geschen sal, demnach ist vnser begeren das ir zwene vwers Raths vnd zwene von der gemeyne mit eym pergamenen offin versigelten machtbriefe hirin gelegether copien lauts vff zeit vnd an stadt als ir eyn ezdtel hiryn finden werdet schicket von Ern

¹⁾ 3 Siegel Pegau, Merseburg, Borna gut erhalten.

gotzen vom ende vnserm Rath vnd lieben getrawen an vnser stadt vnderrihtung vmb die ernuweten verbruderunge vnser ohmen von hessen vnd vnser zcu entphaen / vnd doruff yr liebe gemechtigeten vnd geschickten rethen zcu yren handen erbhuldunge zcu thunde als sich geburt mit vbergebung des machtbrieffs vvorhalten doran geschiedt vnser meynung. geben zcu torgaw vff freitag nach dionysii anno d. LXXXVII.

Wir burgermeister Rath vnde gantze gemeyne der stadt Borne Bekennen offentlich vnd thun kunth allirmeniglich das wir vff der irluchten hochgebornen fursten vnde herren herren friderichs des heiligen Romischen Reichs Ertzmarschalks kurfursten vnd herrn Johannsen gebrudere hertzen zu Sachsen landtgrauen in doringen vnd margguen zu missen vnser gnedigsten vnd gnedigen herrn geheyse vnd beuele / die Erfsamen mit namen gregorius ochillyn die czeit Burgermeister, matthis fleg auch burgermeister andreas halig vnd erhardt halsen von wegen der gemeyne / zcu der hochgebornen fursten vnd herrn herrn wilhelms des eldern / herrn wilhelms des mitlern gebruder landgrauen zu hessen grauen zcu czigenhayn vnd zcu nidde / vnd herrn wilhelms des jungsten yres vettern auch landgrauen zu hessen grauen zcu Katzenelnbogen zcu dietz czu zcygenhayn vnd czu nydde / vnser gnedigen herrn gemechtigten Rethen geschickt vnd yn gantz vnser macht vnd gewalt gegeben haben / mechtigten sie auch wie sich zcu rechte geburt / hirmit geynwertiglich / derselbigen vnser gnedigen herrn von hessen Rethen zcu yrer gnaden handen eyne Rechte erbhuldunge vff die lange hergebrachten verbruderunge zewischen den obgenanten vnsern gnedigsten vnd gnedigen herrn von sachsen / auch yr gnaden vettern vnserm gnedign herrn hertzen albrechten von sachsen eyns / vnd den obgenantm vnsern gnedigen herrn von hessen itzundt widder vornuwet / von vnser vnser erben vnd nachkomen wegen / vnd an vnser Stadt zcu geloben / vnd dornach in vnser vnd yre selen liplichen zcu gote vnd den heiligen zcu sweren / wir geloben vnd swern auch soliche erbhuldunge in crafft ditz briues / also ab geschee das vnser gnedigste vnd gnedige herrn von sachsen alle, adir yrer gnaden elichleybefs mans erben / gar an elich leybes manns erbn mit tode vorgingen / vnd yr gnaden elich leybes manns erben des stammes von sachsen doringen vnd missen gar nicht mehr seyn wurden / das der almechtige got zcu langeweriger czeit geruch gnediglich czu enthalden / So sollen vnd wollen / wir / vnser erben / vnd nachkomen vns an die obgnten vnser gnedign herrn von hessen / adir an yr gnaden elich leybes manns erben semptlich als an vnser rechten naturlichen erbherrn halden / vnd alles das thun / das frome luche yren naturlichen Rechten erbherrn zcu thunde schuldig sint / nicht mynner dan als wir das alles personlich yren gnaden leiplich mit handt in handt gelobt vnd dorezu mit uffgerackten fingern zcu gote vnd den heyligen gesworn hetten / getruwelich vnd an alles geuerde vnd haben des zcu waren Bekentnis Rechter vrkunde vnd steter haldung vnser stadt insigel fur vnser erben vnd nachkomen wilsentlich an diessen brieff lasen hengen. Gegeben am freitag nach Elisabeth der jungsten czal ym LXXXVII jar.

Wie der kursten vnd fursten von Sachsen Brandenburg vnd Hessen amptluche die Erbeynung zcu halten sweren sollenn.

Als meyne gnedigste vnd gnedige herrn die kurfursten vnd fursten von sachsen Brandenburg vnd hessen / Eyne Erpeynung mit eynander haben nach laute der briue / czwischen yrer aller gnaden darvber aufgangen / vndir andern etzlich artikel inn haltindt yr gnaden amptluche berurinde die hirnach folgenn.

Efs sal auch vnser obgntin fursten keyner des andern vyhendt / echter vnd rauber in seynen landen schlossen steten vnd gebieten wissentlich vnd mit vorsatze nicht haussen hegen, schirmen / noch den eyncherley zcu legung forderung hulff noch Rath thun noch durch seyne geczwenge vnde landwere nicht komen lasen / heymlich noch offentlich / adir den seynen gestaten das zcu thunde in keynerley weisse / vnd yn auch keyn geleythe geben / noch geben lasen ane geuerde / were aber das vnser eyns man adir vndirsesses eyner adir mehr / adir sust ymantz vnder vns in vnsern landen dorvber beschedigt wurde / vnde sollich raub / adir name in des andern landt schlosse stete adir gebiete quemenn / vnd das man dem selbigen raube adir name vff frischer tat nach folgt adir in vierzehentagen dornach vnd die selbigen

nachfolger / vnser amptluche / man / Stete, adir vndersassen hieschen adir forderthen / So sollen wir / adir vnser amptluche / man stete / vnd vndersassen die also geheischen vnd angerufft wurden / zu den beschedigern des rechten helffen das die name ane widerrede gekart vnd wider gegeben wurde / vnd nach recht adir nach gnaden wandel dorvmb ergehen ane geuerde /

Els sollen auch alle vnser amptluche in allen vnsern landen ymandt keyn geleythe gebenn / anders dan nach aufweisung dieser vnser eynunge / wir sollen vnd wollen diese obgeschribene eynunge in allen vnsern landen ampten vnd gebieten offentlich gebieten vnd vorkundigen lafsenn das sich eynn yderman dornach wisse zcu richtenn vnd sich mit vnwissenheit nicht entschuldigen moge /

Vff das auch der kauffman vnd eyn itzlich ander mit yrer habe aufs vnd in itzlichen vnsern landenn vnd gebieten sicher seyn / yren kauffmanschatz vnd andern handel vngehindert getreiben / vnd wir die selbigen vnser lande in sollichen fride wider gesetzen vnd brengen mogen / als fur gewest sindt / So sollen vnd wollen wir vnd vnser Erben vnsern amptluchen vnd steten in yren eydt geben vnd entphelhen / das sie die straßen durch vnd in den selbigen vnsern furstenthumen vnd landen bestellen vnd Reyne halten / dorvmbir wir sie ouch handthaben schutzen vnd vorteidingen sollen / wie das noth seyn wirdt ane geuerde / vnd ap vnser eyns fursten man adir diener eyn adir meher zcu dem andern fursten zcu spechen gewonne / Sal ym der selbige furste der angesprochen wirdt / vor seynen prelaten rethen vnd edeln zcu rehte komen vnd ym in dreyen monadten Recht widerfaren lafsen ane lenger vorzeyhen / vnd sal zcu dem rehten dabey / vnde widervmb bys an seyn gewarsam der angesprochen fursten fride vnd geleythe haben alles ungeuerlich.

Ap auch vnser eyns man adir diner in welchen statn adir weisen die sindt zcu des andern herrn man adir diener zcu sprechen hette adir gewonnen / dorvmb sal sich eyn itzlicher an rechte gnugen lafsen / vor dem selbigen herrn vnd seynen Rethen / des man adir diener der antworter ist / Treff els aber burger adir pauern geyn eynander an / den sal man mit rechte von eynander helffen vor den gericht / dorynne eyn itzlicher antworter gesessen ist / vnd sal zcu allen rechten yderman fride vnd geleythe geben ane geuerde.

Item das alle vnser obgnten furstin amptluche wo vnser itzlicher die in vnsern furstenthumen vff vnsern schlossen Steten adir anderswo haben diese Bruderlichen vnd fruntlichen eynunge vff zcu nemen / vnd also volkomehlich vnd vffrichtiglich zcu halten itzundt anfangs vnser allen sweren sollen / vnd ap hirnach vnser amptman eyner adir mehr apginge von todswegenn / adir von dem vns vns / des amptman er ist entsatzt wurde / Sal der herr vns vns / adir vnsern erben des amptman er gewessen ist / von dem / adir den der adir die an des adir der selben stadt gesatzt werdenn / von vnser aller wegen in obgeschribener mafse gelobe vnd eyde nemen / in den nehesten vierzehentagen / nach dem tage, als der adir die gesatzt wurden weren ane geuerde.

Vnde ich dann meyner gnedigsten vnd gnedigen herrn von sachsen etc. obgnant amptman zcu B / byn vnd yre gnade mit mir / als yrem amptman geschafft haben / Sollich erpeynung / ssovil mich die als amptman beruret zcu sweren / dennach gelobe vnd swere ich den obgnten meyner gnedigsten vnd gnedigen herrn allen vnd itzlichenn von sachsen von brandenborg vnd hessen das ich die obvermeltin erpeynunge in den obgeschriben artickeln ssovil mich die / als der genanten meyner gnedigsten vnd gnedigen herrn amptman zcu . . . beruren, die weil ich yr gnaden amptman an dem selbigen ende byn halten sal vnd wil getruwelich vnd ane alles geferde also helffe mir got vnd die heiligen.

Wie meyner gnedigen herrn von sachsen vnderthanen den landtgrauen zu hessen die erbhuldunge swern sollen etc.

Nach dem der durchluchten hochgebornenn fursten vnser gnedigsten vnd gnedigen herrn | herrn friderichs des heyiligen romischen reichs ertzmarshalgk kurfurstenn herrn albrechts vnd herrn johannsen gevettern vnd gebrudere | hertzogen zcu sachsen | landtguen yn doringen vnd margrauen zcu missen an eynem | herrn wilhelms des eldern | herrn wilhelms des mitlern gebrudere | landguen zcu hessen, grauen zcu cziegenhayn vnde zcu nydde | vnd herrn wilhelms des jungsten yres vettern | auch landtgrauen zcu hessen grauen zu katzenelnbogen zcu dietz zcu ziegenhayn vnd zcu nydde am andern teil

|eldern vnd vorfaren lobelicher gedechtnifs lautes der vorschreibung vnd keiſerlicher vorwilligung darvber sagende | zu erbhuldigung yrer aller furstenthumb vnd lande geſeſſen vnd gewest | dorynne auch die vorgenantin vnſer gnedigste vnd gnedige herrn von sachſen vnd von hessen mit eynander herkomen vnd nu durch redelich bewegnuß befließlich eyns wurden sint | Sollich erbhuldigung yr yderteil von den seynen | dem andernteil mit eyden vnd gelobden thun vnd vernuwen zeu laſſen | deme nach als geschee | das meyne gnedigste vnd gnedige herrn von Sachſen vnd yrer gnaden elich leybes Mannes erben adir der selbigen nachkommen elich leibes mannes erben alle apgingen | also das yrer gnaden nachkommen elich leibes mannes erben des stammes zeu Sachſen doringen vnd missen gar nicht mehr seyn wurden | das der almechtige got zeu langweriger czeit gnediglich geruch zeu enthaldten, also dan vnd nicht ehr, So sal vnd wil ich mich an die obgnanten meyne gnedigen herrn von hessen adir an yrer gnaden elich leibes mannes erben, also an meyne rechten naturlichen erbherrn haldten vnd alles das thun das eyn man seynem naturlichen erbherrn haldten vnd alles das thun das eyn man seynem naturlicheu erbherrn zeu thunde schuldig ist, also war mir got helff vnd alle heiligen.

1488.

[40.] Von gotes genaden wir friderich . . . vnd Johanss gebrudere . . . Nachdem in den irrungen zwischen vnsern lieben getrawen Rate vnd Gemeyn vnser Stad Borne eyns vnd Cassparn von der Jhane andersteils. Eyns wasserlaufts halben. den die von Borne in ire teiche greben vnd Stad haben wolden / beiderseit verwillet durch vnsern gleitzman zu Borne vnd lieben getrawen hannsen Podemar ein gutlich spruch gescheen. vnd doch nicht genuglich angenommen. Damit die sache wider an vns gewachsen ist. Bekennen wir das wir vnser lieben getrawen Conrad Triller Gleitzman zu Aldenburg Jorgen von Maltis zu Czirchaw vnd hansen Wolff zu Teckewitz dartzu gegeben die von vnsern wegen nach gescheeener verhorunge von Beidenteilen ganntz verwillet. Einen gutlichen spruch. als sie vns furbracht verfast haben. den wir auch hirmit vssprechen Beiderseit on widerrede vnd on wegerunge hinfurd gehalten zu werden Inmassen hernach geschriben volget. Nemlich das der Rate vnd gantz gemeyn vnser Stat Borne das wasser das in Casspar von der Jhane zugesaget had. hinfur zu ewigen getzeiten gebrawchen vnd geniessen sollen one ydermans vorhinderunge. vnd mogen das wasser furen leiten vnd gehen lassen in ire teiche greben vnd durch ire Stat nach allem irem willen vnd notdurft | vnd Caspar von den Jhane sol die mole itzund uff dem selben wasser gange stehnde zu stund abbrechen wegkthun vnd hinfurd keine mehr daselbst bawen noch haben. Desgleichen die von Borne auch kein mohel noch nichts anders dann den wassergang daselbs zu bawen vnd zu fertigen macht haben | Der wassergang soll dreyer Elen breyt vnd nach notdurft die tieffe halden. Vnd so sichs begibt das derselbig wassergang zu Reinigen vnd zu fegen not wirdt. Das sollen die von Borne macht haben zu thunde vnd den zu Bawen sovil notdurft fordert vnd wann die von Borne fegen oder daran bawen wollen. Das sullen sie Casparn von der Jhane oder sein erben zu wissen thun. Uf das sie das gras oder annders am vfwurfe wegk schicken mogen nicht verderbt zu werden. Vnd so Caspar von der Jhane oder sein erben wassers zu iren wiesen bey dem selben wasserlaufft gelegen zu wessern bedorfn wurden. Sullen die von Borne in an iren schaden zu notdurft gehen lassen. So dan das wasser gehet vber Caspar von der Jhane vnd seiner lewte gutere. mogen die von Borne verwaren das in nicht schaden davon kome noch entstehe. Vnd das wasser soll also vnverhindert seinen gang haben von oben an bis in die Statgraben teiche vnd durch die Stat vnd furdur gehn vf die holtzmule vnd ander Caspars von der Jhane mulen an irrunge. Caspar von der Jhane soll die fischerie inn dem wassergange haben. Doch mit solcher unterscheide was vische vns dem teich an karpfen vnd hechten ufstign vnd in den wasserlaufte quemen. Sollen die von Borne widerzufahren macht haben. fur solchen wassergange grabn die mole abzuthunde vnd vf Caspars von der Jhane vnd seiner lewte gutere zu furn vnd

zu halden. Sullen der Rathe vnd gantz gemein zu Borne Casparn von der Jhane betzalen vnd geben Ein schogk achtzehen groschen jerlichs zinses zu wusten trayen gelegen. vf vier mannen vnd die selben zu stund mit aller pflicht an ine wiesen. Auch sullen die von Borne vns vnd vnsern erben. jerlich in vnser Ampt zu Borne pflegen vnd geben. Sechs heymetzen korns vnd zwey kaphan vnd dismal sechtzig Reinische gulden. derselben dreyssig vf Sant Johannstage Baptiste / vnd die andern dreißig gulden vf Sant Mertinstage schirist kunftig betzalen an vertzug. Sullen also beiderseit / irer gebrechen gutlichn gerichtet vnd entscheiden sein Geben zu Aldenburg vf montag nach purificationis Marie virginis gloriosissime ann. domini (1488).

1489.

Nur das mittelste Siegel erhalten.

[41.] Ich Caspar von der Jhann Bekenne vor mich . . . das ich .. mit Rathe gonst wifsen vnde willen mertens vnde hanfses von der Jhann meyer naturlichen Bruder . . . zu erbe erblich vorkauffe vnde vorkoufft habe . . . czweivndeczwenzig scheffel korn Bornisch mofs jerlichen czynfse mit solicher gerechtigkeit also ich die gehat habe, inn vnde vff der konigenmoll zcu Borne vor der Stadt gelehegenn den Ersamen weissen Burgermeistern, Rathe vnd gantzen gemeyne der Stadt Borne, vnde habe yn die gegeben ye eyn scheffel vor funff groschen vier pfennige eyn heller, vnde eyn schog geldes vor funffvndeczwenzig schog vnde dreissig groschen guter montz, macht an der Summa Eynvndeffunffzig schog funffvndeczwenzig groschen vier pfennige eyn heller / Soliche Summa geldes itzundt genant hat mir der Burgermeister Rath vnde gancze gemeyne . . . bezalt . . . vnd sage den burgermeister . . . gantz queidt ledig vnde lofs Thu gebe vnde czu sage yn eyne volkomene gewehere des obin genanten kauffs . . . vnde in solichem kauffe habe ich . . . dem Rathe . . . czu gesaget . . . hynforder das wasser in den Roren zcu ewigen geczeiten in dem nawen molgraben von der konigenmol in die stadt zcu furen . . . Geben [1489] ann dem freitage nach der heiligen Jungfrauwen vnd merteryne Sanct katherin tage.

* 1489. G. K. pag. 8. 9.

[42.] In dem namen gottes. Amen. Syntemal alle menschliche werck thete vnd vorordnung aufs eygenschaft ihrer natur vergeflich vnd vergenglich syndt daromb not ist solche werck thete vnd vorordnung die got dem almechtigen zw lobe vnd ehre seinen heiligen beschehen vnd vorordent werden mit vrkondt und glaubwürdigen brieffen zw bestetigen davon aufs gemelter vrsach Bekennen wir Tilo von gots gnaden bischoff zw Merseburgk vor vns vnd vnser nachkommen vnd thun kundt allen vnd iglichen die diesen brieff sehen horen oder lesen das der Ersame Rathe zw Born an vns hat gelangen lassen wie das Er Johan Wolff etwan pfarrer zw lobeschitz aufs hitziger lieb vnd begir beweget das lob vnd dynst gottes des almechtigen zw mehrren ihme vorgenommen habe daselbst in der pfarrkirchen zw Borne vnser Bistumbs vff den altar S. Valentini eyn geystlich lehen wochelich mit vier ewigen messen zw styfften vnd den gemelten altar nach seinen vermogen begaben vnd dotiren in demutigem vleyfs bittende wir wolden des genanten Er Johan wolffs andacht betrachten vnd dasselbige lehen aufs bischofflicher vnd ordentlicher macht in nach geschriben form vnd weyse confirmiren vnd bestetigen die zynfs vnd hauptsumma von ihme dazw geezygent aufs wertlicher gewalt nehmen vnd der geystlichkeit zwlegen vnd eygen mit namen sechshundert reynisch gulden an golde heubtgeldes davor bey gedachtem rathe zw Borne dreyssig reinisch gulden jerliche zynfs gekaufft sindt das dan mit gunst vnd volwort der durchleuchtigsten hochgebornen fursten vnd herren herren friderichen Churfursten etc. vnd herren Johansen gebrudern hertzogen zw

Sachsen etc. vnsern gnedigsten herren zugangen vnd geschehen ist als das der kauff briefe darvber gegeben klerlich bemeldet. Auch hat obgemelter Stifter gedachten altar dem Rathe zw Borne vnd iren nachkommen zwverleihen gegeben vnd geeeygent Also das derselbig Rathe solich lehen leyhen vnd dazw presentiren solle, doch nyemant anders denn eynem werltlichen priester der eyns burgers sone daselbst zw Borne sey vnd aldo wonen vnd residiren will aufgeschlossen ob einer zw studirn geschickt were dem selbigen mag der Rathe zw Borne eyn zeyt vorgonnen seyne vier messen dazw er wochlich verpflichtet sein solle mit eynem andern priester zw bestellen vnd vber solich vier wochlich messen sal er auch des Jhars vier mall nemlich vff igliche quattuor tempora die geschlecht des Stiffers Ern Johan wolffs begehnt vnd ehrlich bestellen lassen, mit namen vff den abent mit eyner vigilien vff den morgen mit vier messen zwo zw singen vnd zwo zw lesen vorschaffen Auch dem probst zw Born zw restauro seynes pffarrechten jherlichen funff new groschen der besten ganghafftigen muntze geben. Wann wir aber solich sein andacht vnd verordnung zw mehrung des dynst gottes von gemeltem Rathe zw Borne danckbarlich vntstanden vnd angenommen haben auch solich zimlich bethe an vns beschehen angesehen vnd vilgemeltem Rathe vnd zwvor got dem almechtigen vnd seinen heiligen zw ehre vnd lob gnediglichen erhört vnd aufs bischofflicher ordentlicher macht die obgeschriebene Stiftung vnd vorordnung in allen vnd iglichen ihren puncten stucken vnd artickeln oben bemelt Confirmirt vnd bestetigt haben, Confirmiren vnd bestetigen die hermit in vnd mit krafft dis briefs wollen vnd decerniren dodurch auch aufs vorgeanter ordentlicher macht das die obgeschriebene sechs hundert gulden heuptsumma vnd dreissig reinisch gulden jerliche zynse zw dem vilgedachtem altar vereygent hirturt vor vnd aufs aller werltlicher gewalt gefreyet vnd gezogen in der zale geystlicher gutter beschlossen vnd geschätzt werden sollen Auch die jhenigen die sich zwkunfftig doran vorgreyffen oder vorwircken werden als verstoror vnd zwbrecher geystlicher gutter wie im recht geburlich ist dorvmb gestrafft werden sollen vnd behalten auch vns vnd vnser nachkommen die inweysung vnd investitur zw dem obgemelten altar vnd lehen so oft das zwfalle kommt vnd not seyn wirdt diese vnser Confirmation bestetigung vnd vorordnung wollen wir bey vormeydung des zorn gottes vnd der heyligen patron vnser kirchen zw Merseburg vnvorbruchlich gehalten haben Zw vrkondt aller obgeschriben stuck vnd artickel haben wir obgemelter Tilo wie gottes gnaden bischoff zw Merseburg vnser Insigel vor vns vnd vnser nachkommen an disen brieff lassen hengen Geben nach Christi vnser herrn geburt vierzehnhundert vnd dornach im neun vnd achzigsten jhare Sonabents valentini.

1490.

[43.] Wir hugo Burggraue von leifsnigk vnd herre zcu penigk Bekennen vnd thun kunth vor vns vnser liebenn Brüder vnd erben mitt diefsem vnserm briue vor Jdermeniglich die on Sehen hörn ader lefsin, das wir dem Erborn Caspar von der Jhan vnsern lieben getrawen vnd seinen rechten leibslehen Erben durch fleisiger Bethe getrawer anemder dinsten willen die er vns gethan in Zekunfft hinforder thun solle vnd magk diefse nachgeschriebene guter vnd Zeins von vns vnser herschafft Zeulehen ründe Nemlich zcu wühsten Troyen Ein gut β vnd achtzehen groschn jerlichs Zeins auf den mennern Blesingk zcu Regis Zwewentzig gr. Patz zcu Blumenrode XXVI gr. fritz zcu drenaw XX gr. Baltzar zcu drenaw XII gr. auf michaelis mitt alle dem rechten gericht vnd gerechtikeiten in aller moß die Stadt zcu Born von vns zcu lehen gebrauchung gehabt vnd in wechsels weiß an on gebracht vnd vor vns also auf gelafsen, vnd demütiglichen gebethen Casparn von der jhan zeuleyhen, gereicht vnd geligen haben. Reichen vnd leyhen dem vorgemelten Casparn von der jhan vnd allen seinen rechten leibslehin erben die vorbestimpten guter vnd zins mit aller gerechtikeit, freiheit gewonheit also gnediglich kegenwertiglich mitt vnd incrafft diefse briues die zeuverdienen, vnd furbas von vns vnser Erben, zcu rechten lehen zcu haben Besitzen gnüßenn vnd zcu gebrauchen, den lehen szo offte die zeufalle komet rechte

folge zeuthun alz lehen guter recht vnd gewonheit ist, sich der pflicht kegen vns gebürlich zeu halden. dorbey sindt gewessen. die Erbarñ vnserer lieben getrawen heintz von Mockaw vnd dittrich Tschadras vnd andre glaubwürdige gnugk Czu mehr vrkunde vnd Bekentniß haben wir hugo Burggraue von leifsnigk vnser Ingesigel an dießen briue mit wísen thun hengen der gegeben ist Nach cristi vnser herrn gotz geburt Tausent virhundert im neunzigisten iare am dinstage nach leonhardi.

1490.

Siegel erhalten. (Von gleichem Datum wie die vorhergehende).

[44.] Wir hugo Burggraue von leifsnigk . . . Bekennen . . . das wir den Ersamen weißen Burgermeistern dem gantzen radt, der gemein vnd an ir aller stadt frantzen grofse der Stadt zeu Burn vnsern lieben getrawen, durch sunderlicher fleissiger Bethe, got dem Almechtigen zeu lobe seyner lieben muter marien zeu ere erbietung, vnd getrawer ammender dinsten willenn die sie vns vnserm lieben hern vater löblicher gedechtniße oftmalß gethan, vnd vnsern Erben hinforder thun sollen vnd mögen dieße nach geschriben guter vnd zeinß von vns vnser herschafft zeu lehen ründe Nemlich zeu gnendorff in der flure gelegen zewey β vnd virzeigk gr. etzlich pfennige weniger ader mehr. auf den mennern hirnach beschriben zeu gnendorff besessen auf walpurgis mauritius zeymermann VII gr. vnd drey pfennigk lampgelt, hans greser VIII gr. III \mathcal{S} lampgelt Caspar rumpf III gr. III \mathcal{S} lampgelt. Item zeu burn besessen hans woncker XI gr. von einem acker vnd wísen Caspar gortler VII gr. VIII \mathcal{S} von eckern. Symon Bethlehen II gr. von acker. hans steltzner VIII gr. vom acker Caspar weißgerber III gr. von acker. Clement Sneider VI gr. von acker, paul ortel V gr. vom forberge III gr. vom garten der gleizman V gr. vom leimhaufs clement partezsch III gr. vom acker, Bartel Eberhart III gr. VIII \mathcal{S} von acker. Benedictus paul III gr. von acker. Michaelis zeinß hirnach folgende Mauritius Zeymerman VII gr. vnd III \mathcal{S} vor 1 rauchhenne, hans greßer VIII gr. VI \mathcal{S} vor ein henne vnd 1 heimetzen haffern. Caspar rumpf III gr. Idem III gr. vor eine henne vnd 2 Kaphan Item hans woncker XI gr. idem III gr. vor 2 kaphan vnd 1 rauchhenne von der wísen vnd acker Caspar gortler VII gr. VIII \mathcal{S} Symon Bethlehem II gr. hans Steltzner VIII gr. Caspar wíßgerber III gr. Clement Sneider VI gr. VI \mathcal{S} vor 1 henne paul ortel V gr. vom forberge III gr. vom garten der gleitzman V gr. vom leimhaufs. Garten Clement partsch III gr. Bartel Eberhart III gr. VIII \mathcal{S} idem III \mathcal{S} vor 1 henne Benedictus paul III gr. mitt zeinßen dinsten pflichten Gerichten vnd gerechtikeiten im felde vnd dorffe in aller mofsen Melchior von Wolckaw seliger etwan von vnser herschafft zeu lehen in gebrauchunge gehabt vnd auf sie wol herbracht zeu eynem Althar vnser lieben frauen gereicht vnd geligen haben mit alle dem rechten sfo vns zuevorleyhen von rechtswegen geburt Reichen vnd leyhen den gedachten burgermeister, radtman, der gemeyn vnd von ir aller wegen frantzen grofse der Stadt Burgern allen iren nachkomling solche vorbestimpte guter mitt aller gerechtikeit also gnediglich kegenwertiglich mitt vnd in crafft dieß brieffs die zuevordienen den lehen so offte die zeu falle komen rechte folge zeu thun, alz solch guter recht vnd gewonheit ist Sich mitt manspflicht kegen vns gebürlich vnd mitt der lehin ware wie gewonlich kegen vns vnsern nachkomenden zeu halden, dorbey sindt gewest die Erbarñ vnserer lieben getrawen veit von brieffen caspar von der jhan vnd Rampfolt von konritz

1492.

[45.] Wir Thomas von gots vnd des heiligen romischen Stuls gnaden apt zw pegaw dem selbigen Romischen stule ane mittel vnderworffen Sanct Benedicti ordens Merfseburgers bischtumbs Bekennen . . . das wir mit sunderlichem radte bewust willen vnd gunst vnser convents mit dem Erbarñ vnd vehsten vnserm lieben getruwen Caspar von der

jhan auch mit wissen vnd verwillung der Erbarh vnd vehsten vnser lieben getrawen Mertins vnd hansen von der jhan seiner bruder eyns wechsels eyns worden vnd vberkomen sindt vmb alle die gutter zcinsse, renthe, lehen, gerichte vnd gerechtikeite dye genante von der jhane von vns vnd vnserm gotshawfse czw lehen haben vnd tragen. Nemlich zw drofskaw vier hufen wyeden weyde vnd teiche auch hawfs vnd hoff ierlichen funff schog acht groschen zwene caphan vier huner vnd eynen koltsch zcinsend besitzt itzt eyner bawnack genant. item zw Tornaw eynen hoff besitzt nisius voit zcinsend sechs groschen vnd zwey huner. item zweyteil einer halben hufen besitzt derselbige nysius zcinst zwey huner. item eynen hoff besitzt hans sagk zcinst drey groschen. item eyne hofereythe lehen-gut besitzt simon wochenschuch zw Domsaw gibt eynen caphan zwm nawen iare, item eyne halbe hufe besitzt hans weber zcinst dreyvndzwenzigstenhalben groschen. item eyn drittenteyl eyner halben hufe besitzt auch hans weber zcinst zwey huner. item eine weissen besitzt auch hans weber zcinst drey huner. item eyne hufen besitzt glorius Schrötter zcinst ein halb schog. item eyne hofereythe besitzt auch glorius schrotter zcinst eynen groschen. item eynen hoff besitzt Caspar werfeylt ist lehengudt gibt eynen caphan. item eynen hoff besitzt glorius meifsner zcinst acht alde groschen. item eyne halbe hufe besitzt Clemen bule zcinst dreyvndzwenzigstenhalben gr. item zw Sesten eyne halbe hufe besitzt philip moller zcinst dreyvndzwenzigstenhalben gr. item eyne halbe hufe besytzt gratius moller zcinst dreyvndzwenzigstenhalben gr. item eynen hoff lehengudt besitzt Ciriax Kramentz gibt zwene caphan item eine halbe hufe besitzt glorius Schrotter zcinst dreissig groschen. item eine hufe besitzt Nysius Voydt zcinst zw der messe im Spittal vor pegaw funfvndvierzig groschen daran dye von der jhan dye lehen haben, item eigne halbe hufe besitzt kylian hutt czinst dreissig groschen auch zw der messe daran dye von der jhan dye lehen haben. item eyne hufe besitzt Ciriax kramentz zcinst funfvndvierzig gr. zw der messe daran dye von der jhan dye lehen haben auch alle andern gutter zw der vorigen messen czinsend vnd dye von der jhan dye lehen daran haben. item zw moschwitz eine halbe hufe besitzt hans weber czinst eyllf gr. zwene caphan. item eyne halbe hufe besitzt peter smidt zcinst zehen gr. zw Storsedel zwene acker felde gleich besitzt Simon summitzk geben zwene caphan zwm nawen jare. item dye gutter dye bastian drollitsch zw Tawchen besitzt zcinsen funff groschen vnd auf allen obgeschriben höfen hofereythen erbgerichte auch alle ander gutter im gefielde gelegen von vns vnd vnserm stift zw lehen rürend, haben ym darvor gegeben, vnser dorff Buckwitz mit lehen gerichtten gemeynen, zcinsen auch mit den stulhufen, sovil der in buckwitzer marck lyegen, vnd andern freyheythen, wasser weyden, allen zwgehörungen vnd nutze so wirs bisher gehabt haben aufgeslossen was dye von borne auf eynen widderkawff innehaben auch eynen teich dye helte den wir mit ym vnder kitschers teiche machen sullen auf gleichen teyl, vnd vnser holtz daselbst, mit acht ruthen breydt leyden davor abe so lang das holtz ist, als wir das mit graben vnd steynen vermohlen lassen werden. darinne vnd auff dye mehergedachten vonn der jahn yre erbin vnd erbnemen keyne trifft, iagt, noch eincherley dinstbarkeyt haben sullen, auch dye in zwkunfftigen geczeytten widder vbung nach keynerley ander sachen nicht erwerbenn, So haben dye vilgenanten von der jhan besitzer, der gutter zw drofskaw Tornaw Sesten muschwitz Tauchen vnd Storsedel obbemelt mit zcinsen vnd lehen abegetretten, auch der messen im spittal zcinslewthe mit den lehen an vns geweißt vns derselbigen gutter mit hand vnd munde allenthalben aufgelassen Desgleichen wir yn widdervmb buckewitz vnd andres obgeschreibens, doch obbemelter aufszcyhung vnschedelichen abegetretten, vbergeantwortt, vnd gelyehen haben, oberantwurtten vnd leyhen das den vilgenanten von der jhan in gesamt mit vnd incrafft dießes briues frey ledig wye lehen vnd Rittergutter recht vnd gewonheit ist, Szo das sye den lehen so vfte dye zwfalle komen rechte folge thun, Des zw warem bekentniß vnd mehrer sicherheit haben wir Thomas apt obgenant vnser ingesigill vnden an dießen briff wissentlich thun hengen, vnd wir michael prior vnd gantze sampnung des gestifts Sanct Jacofs zw pegaw Bekennen hymit das solchs wie obgeschrebin mit vnsern willen wissen vnd volborth gescheen ist. Vnd zw mehrem glawben vnd bekentniß vnser Sampnung ingesigill an dießen briff neben vnd bey gedachten vnser

herrn von pegaw Ingesigill wissentlich hengen lassen der gegeben ist an montage nach misericordias domini.

1493.

[46.] Vor mich alle meine leibes lehenns erbenn vnnnd erbnemenn Bekenne ich Caspar vonn Gane vnnnd will das solchs aller meinicklich vnnnd wo not vffennbar seyenn sall Das ich mich zzeitlich rath gnucksamer betrachtung verwilligung vnnnd zeu statung Mertens vnnnd hannßenn von der Gane meiner bruder alle mit belehendenn Recht vnnnd auch redlichenn habe awffgebenn vnnnd verkawfft erblich verkawffe vnnnd gebe awff mit crafft dieses brieffs wie sich dann ein rechter vnwiddersprechlicher Erbkawff aller best vnnnd durch recht awff allenn vnnnd iczlichenn gerichtenn inn eines rechtenn redlichenn kawffs weise Zcu thunde geburet Auch crafft vnnnd macht habenn sall / ane alles geferde Denn Ersamenn weysenn Burgermeistern vnnnd Rathmannenn vnnnd gemeiner Stadt Bornn Das schlos vor Bornne gelegenn mit aller seiner zugehoringge gemeinicklich gannez vnnnd gar mit denn Erbgerichtenn vnd vierzehenn gerttenenn mit denn Zeinssenn geschossenn fronen dienstenn geholtz ackernn wesenn teichenn teichstetenn fischereienn wasserleuffttenn trifftenn wunnenn vnd weidenn Besuch vnnnd vnnbesucht nichtis awfgeschlossenn hirinnen benant adder vnbenant mit diessen nachgeschribenn guttern Alls nemlich Dammelwicz Bockwicz Hermistorff vnnnd was ich vonn Hannsenn Cunricz gekawfft habe in der gnanndorffer flure vnnnd ich auch vormals dor ynn gehabt habe / vnnnd die holcz mole vor dem pegischenn thore gelegenn mit einem Silbernn Schock geldes Eynn Stein Vnnßlat vnnnd achtvndvierzick scheffel kornnes Bornisch maefs auch vier kaphanenn mit sampt aller irer zew gehoringe Nutzung vnnnd gebrauchung nichtes awsgeschlossenn / vnnnd die zcinse zew Wicznicz alls nemlich Einvndfunffzick silbernn groschenn vnnnd die Zeinse zew Troye alls nemlich Ein silbernn schock achtzehenn Silbernn groschenn vnnnd denn gartenn vor dem schlosse gelegenn Bis ann die haws mole / inn denn obgenantenn guttern Sall ich Egedochter Caspar von der Gan dem genantenn Rath vnnnd gemeiner Stadt Bornn funffvndzwenzick Silbernn schock vnnnd drey vnnnd dreissick Silbernn groschenn zcinßs gewerenn wo sich der mynner erfindenn Sall mir ye vonn einem silbern Schock funffvndzwenzick silbernn Schock geldes abegehenn Ann dem hinderstelligenn gelde das mir der genante rath schuldigt bleibt mitt allenn vnnnd itzlichenn yerenn zew vnnnd inn gehoringgenn nutzunge vnnnd gebrauchung wie obenn gemelt inn aller maß vnd form wie ich die gebraucht vnnnd innenn gehabt habe vnnnde wie die in yerenn Reynenn begriffenn vnd gelegenn benannt adder vnbenannt gar nichts awfgeschlossenn Vnnnd habe yenn die gegebenn vnnnd verkawfft vor Sechs Tawsenn Neunhundert vnnnd Sibenvndsechzick Reinnische guldenn Solliche summa geldes mir der genant Rath vnnnd gemeyne stadt Bornne zew dancke bar vber bezcalt vnnnd enricht habenn vnnnd sage sye sollicher summa geldes inn crafft dieses Briefes quied leddig vnnnd lofs gerede vnnnd gelob ich obgenannter Caspar vonn Gane vor mich Meyne leibes lehenns Erbenn vnnnd Erbnemenn dem genantenn Rath vnnnd gemeyner Stadt Solliche gutter wie obenberuret mit aller gerechtigkeit die ich darann gehabt hab genant adder vnbenannt wie gehort ist nichtis vorbehaltten Eynem ydermann frey vnnnd vor aller ansprach vnversant wie sich das zew rechte geburt vnnnd lanndes gewonheit ist Eynn Rechte gewere seyenn wie gewere inn meiner gnedigstenn vnd gnedigenn herrenn lannde vnnnd furstenntum recht vnnnd gewonheit ist vnnnd wo aber meinne kawffer Einigerley schaden adder sunst beschwerung mit rechte Solde zew gemessenn werdenn vonn wem das were adder geschehenn wurde Es were vonn geistlichenn adder werntlichenn lewtenn adder gerichtenn Das alles wyll ich vnnnd meine leibes lehenns Erbenn vnnnd erbnemenn yenn awfsrichtenn versprechenn vnnnd vorstant machenn gegenn aller meinicklich Czw stetter haldung Szo gerede vnnnd gelobe ich viel genantter Caspar vonn der Gane vor mich vnnnd vor meine leibes lehenns Erbenn Das alle stuck vnnnd gesez dieses brieffs stet gannez vnnnd vnverbrochlich sollenn gehaldenn

werdenn wie gehort alle geferde hindann gesaczt wir drey vonn der Gane gebruder verschreibenn vnns des vor vnns vnnsers leibes lehenns Erbenn mitt der aller bestenn form ordnung vnd weyse wie das aws Crafft der geschribenn Recht Hirczw sall vnnd magk gehorenn wollenn auch sulch vnnsers vorschreibunn haltenn Bey vnnsern trawenn warenn worttenn wie frummenn Eddellewtenn geburt vereignet vnnd zcw stet Des zcw merer sicherheit habenn wir vnnd eyenn itzlicher inn fsunderheit Seynn eygenn angeborenn Innsigel vor vnns vnnd vnnsers leibes lehenns Erbenn mit Bewust hie vnndenn ann diessenn Brieff gehannggenn Der do gegeben ist nach Cristi vnnsers liebenn Herren gebort vierzehennhundert vnnd dor nach im drey vnd neunczigstenn Jare am Montag nach Michahelis.

1493.

[47.] Wir Johannis von gots gnaden Hertzog zw Sachsenn . . . Bekennen fur vns vnnd den Hochgebornnen furstn hern friderichen . . . Churfursten . . . Als sich zewischen . . . dem Rathe zu Borne . . . vnd Casparn von der Jhane . . . Irrung vnd gebrechen gehaldenn / Derhalben sie sich gein vnns oftmals der beswerunge So eynem teil vom andern zugefugert wurde beclagt Haben wir vnser Rethe . . . Ern Heinrichen vom ende Ritter hofemeister vnd hansen von Oberritz Amptmann zu Aldenburg dahyn gefertigt mit bevelhe Die berurrtten parthen vmb vermelte gebrechen gnuglich zuvorhoren vnd die ort der irrung zubesichtigenn mit ankerung guts vleifs Sie durch zymliche mittel zu entrichten in krafft sollichs beuelhs die benannten vnser Rethe diese nachvolgende abrede vnd Schied nach gethaner verhorung vnd besichtigung mit willen und wissen der parth gethan vnd vns furgetragen Die wir dann fur gleich nach gestalten sachen ansehen vnd . . . bestetigt haben . . . zum ersten Als die von Borne clagend furgewand wie sie von Casparn von der Jhane vnd den seynen auf yren vnd der Stat gutern mit treiben vnd hutten seins vihes beswert wurden Ist abgeredt das Caspar von der Jhane sein guter Als Nemlich Bugkwitz vnd seyn vorwerck gute vnd sunst kein ander guter in der bornschen flure gelegenn mit seynem vihe besuchen noch hutten Delsgleichen auch die von Born auf den gutern Nemlich Buckwitz vnd seynem vorwercksgute mit yrem vihe auch nicht darauff treiben noch hutten sollenn / zum andern als die von Born furbrachten wie yn Caspar v. d. Jh. mit vfrichtung eins nawenn teichs etliche yre gemeinde beschedigt haben solt Des aber Caspar nicht gestanden dannoch ist vff beiderteil bewilligenn Beredt das der genant C. v. d. Jh. zu widerstattung derselben beschedigtenn gemeyne vier acker velt art landes die do gelegen sind bey des Pfarrers ackern / zu Borne mit aller freyheit als er sie gebraucht had vnd auch mit sayd ytzund darauff stehend den von Born gebenn vnd volgen lassenn solle zu yrer notdorfft ane sein vnd seiner erben vorhinderung vnd intrag auf ewikeit zu gebrauchen Zum dritten haben die von Borne von gemeyner stat wegen bewilligt vnd Casparn v. d. Jh. die gunst getan also das er die gemeyne wege mit seynem vihe auff sein wiesen vnd gutere zu treibn vnd zu faren nach seiner notdorfft gebrauchen mag von yn vnd yren nachkomen vnvorhindert Darnach ist zewischen den alden Stettern zu Borne vnd dem gedachten Caspar v. d. Jh. die auch der trifft halben in irrungen stunden / beredt vnd entscheidenn / also das die alden stetter treiben mogen mit yrem vihe in bugkwitzer flure inmassen sie von alders getriebenn vnd gethan haben vnvorhindert von Casparn v. d. Jh. awfsgelassen die heyde vor der Aptey sollen sie vermeydenn vnd nicht darauff treibenn Es soll ouch der genant Caspar v. d. Jh. denselben aldenstettern zu Born yre ertrenkten guter gnuglich zuvorgnugen an gelegen stellen / nach anweisung vnd erkenntnus vnser Gleitzmans zu Borne mit gutem veld damit sie wol vergnugt werden. Caspar v. d. Jh. sal mit seinen schaffenn auf der Aldenstetter marck das die von wenigen Born mit gebrauchen nicht treyben noch die daran bedrangn vnd sollen die ytz genannten parthen . . . hirmitt der berurrtten irrung . . . entscheiden seyn vnd bleiben vnd in guter nachbarlicher eynickeit sich halden . . . Geben zu Torgaw dornstags nach dem Sontage misericordia domini.

1493. Siegel gut erhalten.

[48.] Wir hugo Burggrafe von leifsnigk vnnnd herre zcu penigk Bekennen . . . das wir dem Erbarn . . . Balthezar vonn Osse . . . das dorff . . . Gnandorff mit aller zeugehorung zeinsen dinsten fronen pflichten gnissen vnd triffenn, gerichtten vnd gerechtikeiten in aller mafse als das Ramfolt von könritz von vns zcu lehin gehabtt, vnnnd an vnser handt auff gelassen, zcu rechten lehin gereicht vnd geligen haben, mitt alle dem rechten, so vns von rechtswegenn zcuverleyhenn geburth ausgeschlossen vier alde β jerlicher zeinfs die wir vor vns vnser Erben auß geczogen vnnnd avff den guttern zcuvoorauß behalden haben Reichen vnnnd leyhenn dem genantenn Balthezar vonn Osse vnnnd seynen rechten leibtlehen Erbenn, solche vorbestimpte gutter in aller mofs wie vorberürth, mit aller gerechtikeitt, freyheitt gewonheitt also gnedigklich kegenwertiglich mitt vnnnd in crafft diefs brieffs, die zcuordienen, den lehin so offte die zcu falle komen rechte folge zcu thun alz lehingutter recht vnnnd gewonheitt ist, Sich mitt mannespflicht kegenn vns geburlich zcu halden, Dorbey sindt gewesen, die Erbarn . . . hans vom Einsidel, peter vonn vlewben vnd andre glawbwirdige gnugk . . . am dinstage nach sontage Letare.

1494.

[49.] Wir von gots gnadenn friderich . . . vnd Johannis gebrudere Herzogen zw Sachsen . . . Nachdem vnser lieber getrawer Caspar von der Jhane etlich guter vnd zins inn vnnsere pflege borne vnd vast nahe bey vnd vmb die Stad gelegenn gehabt. Derhalben zwischen Ime dem Rathe vnnnd burgern daselbst zu zceiten gezcencke vnd vnwillenn entstanden. das alles zuvormeyden vnd vmb sunder bequemlicheit willen haben die gemelten von borne dieselben guter vnd zins von genantem Caspar von der Jhane erblich Erkauft und vns vmb vorleyhung derselben angesucht Als Bekenen wir fur vnns vnser Erben, vnd thun kunth allermeniglichen Das wir solliche angezeigte gezcencke vnd widerwillen zuvorhuten vnd vmb besserung willen gemeiner Stat vnd der inwoner zw Borne sollichen kouff bewilligt vnd dem Rathe . . . dieselben erkoufften vnd nachgeschriben guter vnd zins von vns rurend nemlich die Burgklehenn mit den Eckern wiesenwachsen holtzern. Die graben vmb das Slos mit yren vfern bifs an die muer als die vorreynt sind. Teich vnd fischereyen daselbst den gartten vor dem Sloss mit dem Thamme bifs an die hufsmöle. Die hufsmöle mit yrer zugehorunge vnd zinsen. Nemlich eyn schogk groschen viervndzweentzig scheffel korn darzu die fischerey in dem wasser als weyth als das mollgut begriffen hat. vierzehen gertner mit yren zinsen. dinsten fronen vf denselben lewten die erbgericht vf der mole die einzeln zins vor der Stadt vnd ouch darinne von holtzern ackern wiesenn kaphanen lambsbuchen bey zeweyen schocken. vff itzlichen topffer wo er zw Borne wonet vnd topff macht vnd Borne sieben schog Eyer jerlichs zinses. Die konigsmole mit zweenvndzweentzig scheffel korns. Die holtzmole mit yrer zugehorunge mit vier malder korns Eynem schogk groschenn. Eyn steyn vnslits vier kaphanen jerlichs zinses. vnd das gut vf dem Berge das fuwers vnd der Meygenbergeryne gewest. Item zw heringstorff eyn hufe mit funffzehen groschen zins zu apesdorff vier hunerzins. item das dorff dommelwitz mit seinen zinsen dinsten fronen vnd darauß die erbgericht vnd etliche hufenn zu heynerisdorff inmassen das selbig dorff vnd hufen von hansen von konritz an den genanten Caspar v. d. Jh. koufflich kommen vnd von ime hiemit auch vorkoufft sind ydes mit sollichen eren nutzen werden freyheyten gerechtickeyten gewonheyten vnnnd zw gehorungen nichts awfsgelassen Sondern in allermassen Er die bisher innengehapt genossen gebraucht vnd von vns zu lehen redelich herbracht had gelyhenn vnd vorerbt habenn Leyhen vnd vorerben ine die hiermit gnediglich vnd geinwertiglich Also das der Rath vnd gemeyne zw Borne vnd yre nachkommen Sollich obgeschriben guter vnd zins mit vorangezeigtn vnd andern yren zugehorungenn fur diner von vns vnd vnsern Erben zw rechtem erbgute innehabenn besitzen genyssen vnd gebrauchen nach yrem vnd der stat besten nutz vnd frommen von meniglich daran vnvorhindert mit diesem briue . . . Doch sollen Rath vnd gemeinde zu Born . . . die ytzgemelten

guter mit eynem Erbarñ vnd dreyen Reifsigen pferden gein vns vnsern erben . . . vordienen vnd also darinnen haldenn inmassen ander vnser Erbermanne in vermelter pflege thun vnd herkomen ist. Wir haben vns auch darzu vnser Zolle geleyt wiltpanne vnd obergericht auf bestympten gutern vorbehalten vnd behalten vns die bevor wissentlich mit diesem briue und wollen das vns sollich vorleyhung derselben guter gantz keynen schaden daran fugen noch bringenn Sundern vnns vnsern erben vñnd nachkommen an gedachten vorbehaltenen stucken sampt angezeigten vordinst vnschedelich sein sollen alles ane geuerde hirbey sind gewest . . . vnser Rete . . . Der Edel heinrich Rewfse von Plawen herre zw groitz vnd Cranchuelt Hans leymbach vnser Lantrentmeister . . . Geben zu Torgaw am Sontag der vnschuldigen kindeleyntag (1494).¹⁾

1495. Siegel gut erhalten.

[50] Wir Georgius . . . abt zcu pegaw Bekennen . . . das wir . . . den . . . Burgermeistern Rathmannen Richtern Scheppenn heuptleuthenn vnd der gantzenn gemeynn . . . der Stadt bornn . . . gelegenn habenn das dorff Bockewitz bey bornn gelegen vñnd Caspar vonn der ihan eyn zceyt vonn vns inngelast vnd vffgelast hadt Reichenn vnd leyenn on das obgnant dorff mit allen gerechtikeitenn nutzenn wirdenn gewonheitenn folgenn dinstenn pordenn zcu vñnd eingehorungenn nichts aufgeschlofenn zcu rechtem lehngute mit vñnd in crafft disses briufs hynforder zu habenn zu besitzenn vñnd zcu gebrauchenn als lehnguter recht vnd gewonheit ist sie vñnd allen oren nachkommenn auff ewikeit ane vnser vñnd alle vnser nochkommen eintrag vñnd einrede Doch in der gestalt das die obgnantenn burgermeistere rethe richter scheppenn hauptleuthe vñnd die gantze gemeynn der Stadt Born vñnd alle ire nachkommenn den lehin rechte volge thun mit uffgerackten fingern zcu schwern getraw vñnd gewer zcu seyn all offt ein nawer herr vñnd abt zcu pegaw im closter gekorenn vñnd bestetiget wirt alz lehnguter recht vñnd gewonheit ist vñnd allewege funffzehenn gulden an golde dem nawenn herrnn abte zcu lehnwar gebenn sullenn so offt sich das vorfellet wie obgedacht allis gefehr eintrag vñnd argelist hirinn endangesatz vñnd aufgeschlofenn Dorbey sindt alz gezeugenn gewest der Erwirdige in gotuater vñnd herr Conradt abt zcu iofska herr Conrad procurator des closters pegaw, herr matheus steuernail provisor, herr nicolaus seidel prediger, herr nicklaufs bofsell Capellann, herr andreas deinhart schulmeister, leonhardus scheffner die zceit Statschreiber Michael pulz die zceit official zcu pegaw . . . (1495) uff mitwoch noch Briccii des heiligen beichtigers.

¹⁾ Die Lehensbriefe, welche das Rittergut Gndorf und das Schlossgut betreffen, machen in ihren 1533. 1548. 1554. 1586. 1592. 1612. 1638. 1658. 1681. 1747. 1828 vorhandenen Erneuerungen den Hauptteil der späteren Originalurkunden aus. Unter diesen ist geschichtlich interessant nur die von 1548, welche in ihrem einleitenden Satze folgendermassen gefasst ist: Nachdem sich czwischen . . . Carolum dem funfften . . . vnd . . . Johann friderichenn . . . vnsern liebenn vedttern kriegshandlung czuge-tragen / also das hochstgedachte kay. May. Gemelten vnsern vedttern in irer kays. May. vnd des kay. Reichs acht vnd aberacht erclert vnd seiner liebden personn landt vnd leute inn ire hende gebracht vnd mit seiner liebden Wissens vnd bewilligung eyne Capitulationn vnd Richtung volntzogenn, welche seine liebe gereth vnd versprochen im wortte der warheit Treulich vnd Erbarlich czu haltenn Nach Besage der vorsigelten vnd vnderschiedenen Capitulationn, derer data stehet Inn irer kais. May. feltlager vor witemperg am 19. tage des Monats May [1547] inn welcher richtung sich gedachter vnser vetter vor sich seine Erben vnd nachkomen vorzeichnet inn der kays. may. hende aller Gerechtigkeit des Churfurstenthumbs czu Sachsenn vnd anderer Seinen liebden Lande vnd leute Dorauff auch die kay. May. in derselben Capitulationn mit vnserer Bewilligung vorordnung gethan was seiner liebden kindern an seinen gewesenen landen vnd leuten bleibenn vnd das die andern Landt amt stette lehenschafft vnd guter ausserhalbenn etlicher Bemischenn lehennstucke vns vnd vnsern erben bleiben sollen wie dann auch yre k. M. das Ertzmarschalchamt vnd die Chur czu Sachsenn auch die vbrigen lande ann vns vnd vnsern lehinserben als den nehsten agnaten vnd mitbelehentenn allergnedigst gegeben vnd Belehennnt . . . Bekennen . . . Zeugen: Christoff von Taubenheim auf Bedra Ritter George v. Karlowitz der Elder vffen kribennstein Ernst von Miltitz auff Watzdorff vnser Oberhauptmann des meissenischen Kreises Christoff von karlowitz zu Zcorbick George kommerstat auff kalkreuth Ludovicus Fachs ordinarius zu Leipzig, damian v. Sibottendorff secretarius Meissen 9. Juli 1548.

1495.

[51.] Vff mitwoch noch Briccii Im funffvndnewnczigisten iar in der probistey zcu Born ist eyn beredungh vnd volkommender beteyding czwischenn dem wirdigenn in gotuater vnd herrn Georgen abt zcu pegaw eyns vnd den Erfsamen weißenn Matth. winkeler burgermeister . . . *(folgen die Namen der 3 Stadträte)* mit wissenn vnd willenn der ganczen gemeyn anders theils Belangende das dorff Buckewitz mit seyner gerechtikeit das sie Caspar von der jhan abegekaufft vnd von meynem gnedigen hern von pegaw zcu lehen ruret / gescheen in mafsenn er noch folget Nemlichen das meyn gnediger herr von pegaw den von Born obgnant das dorff Bockewitz vor der Stat born gelegen zcu rechtem lehgute leyen sall vnd gelegen hadt mit aller gerechtikeit in mafsenn im lehenn briffe dor vber gegeben begriffenn vnd aufgedrucket ist Dorkegenn haben die obgenanten Burgermeister Rethe vnd dye gancze gemeyn der Stat Born vor sich vnd alle ore nachkommen meynem gnedigenn herrn von pegaw geredt gelobt zcugesaget vnd gegeben ein halbteill der teichstat Bockewitz genant vnder kitschers teiche hir abe gelegenn noch aufweißvng Caspars von der jhane vorschreibungh vnd geben dy seyner gnaden vnd closter vnd allen seyner nachkommenden epten geinwertiglichen aufs volkomener rathe guten witezzen wissenn willen vnd betrachtungh mit vnd in crafft dißis briffs ewiglichenn zcu haben vnd zcu genissenn vnd zcu gebrauchen an alle ir vnd irer nachkommen einrede vnd eintrag ane geferde wollen auch der teichstadt rechte gewer sein gein meynen gnedigenn herrn von pegaw vor ydermeniglichs ansprache Iso offt sulchs meynem gnedigenn herrn von pegaw not seyn wurde Dor zcu haben dy von born obgenant meynem gnedigenn herrn von pegaw geredt vnd zcugesaget Sagn auch das seyner gnadenn zcu geinwertiglichen mit vnd in krafft dißes briffs wenn seyn gnade ader seyner gnadenn nachkommen in meynung weren ader wurden uff der probistey weisenn vnder der stadt teichenn der vor Born gelegenn eynenn ader mehr teiche zcu oren nutzenn zcu machenn Das alz denn die von Born offtgnant von yrem wasser auff seyner gnadenn ader seyner gnadenn nachkommen ansynnen des iars eyn mall zcu seyner gnadenn teichenn in irem abgange wenn ifs seyner gnadenn ader gnadenn nachkommende am beqwemistenn seyn wurde zcu gehn laßenn wenn auch dy von born ire teiche fischenn wurden ader das wasser weldenn laßenn abelauffen ader sustenn regenn wasser Iso vil uberig wurde das ifs dy von born zcu yren teichenn vnd molen nichtenn dorfften ader ane schaden entperen mochtenn Das als denn wu ifs seyner gnade ader seyner gnadenn nachkommen begern wurde in seyner gnadenn teiche in yrem abegange zcu gehn laßenn vnd seyner gnadenn sulch ablaßenn der teiche in dy probistey zzeitlich do vor vorkundigenn wurde ifs aber sache das vnnßern gnedigenn herrn wasser in seyn teiche zcu gehen ye Iso not wurde das zcukunfftiger schade dor aufs vor-marckt vnd vns dorvmb gruffsenn vnd fruntlichenn gein vns hilde welden wir zcu seyner gnadenn notdorfft wu wir das ane vnnßern schadenn gethun konden williglichen zcu gehen laßenn vnd in dem guten willen vnd nachwarschafft beweissenn Sulchs seyner gnade vnd seyner gnaden nachkommen widervmb thun wollen alle argelist vnd gefehr Hirinn endangesetzt vnd vnd awßgeschloßenn Dorbey sindt als gezeugen gewessenn der erwidige in gotuater vnd herr Conrad abt zcu jofska herr Conrad procurator des closters pegaw Er matheus steuernail provisor zcu Born Er nicklaufs seidel prediger Er nicklaufs Bofsel caplann Er andreas deinhart schulmeister leonhardus scheffner stadtschreiber zcu Born vnd michael pultz official zcu pegaw zcu den dingen geruffnem offinwaren schreiber vnd ander vil glaubwirdigr mehr Czu vrkund vnd mehrer sicherheit des contracts vnd beteidings auch vmb ewiger vnd steter haldung willenn sindt vff befehl beyder part zewene briffe eynes lauts gemacht vnd beyde briffe mit des erwidigen in gotuater vnd herrn georgenn abt zcu pegaw mit sampt des Erfsamen vnd weißenn Rats vnd gemeyner stadt born insigeln mit willn vnd wissenn angehangen vnd vorsichert Der gebenn ist noch cristi vnnßers liebenn herrn geburt tausent virhundert dor noch im funffvndneunczigisten jarn vff mitwoch noch briccii des heiligen beichtigers.

[52.] In dem Namen der heiligen ungetheilten dreifaldigkeit got vaters sonen vnd des heiligen geistes amen. Nachdem vnd als aller menschen thuen vnd werg vñs eigenschafft yrer natur vorgenglich vnd vorgeslich seindt darvmb fordert die notdorfft wol solch werg vnd geschefte die do gote zu lobe vnd Marien der Edeln jungfrawen seiner lieben mutter vnd allen gots heyligen zu eren bescheen mit brifflicher vrkunde gnuglich zu vorsehen auff das die mit der Zeit nicht vffgehn vnd vergessen werden Dodurch Bekennen wir Tilo von gots gnaden Bischoff zu Merfsburgk . . . das der Erfsame Rate zu Borne an vns hat gelangen lassen wie das im clemens partzsch seliger etwan burger zu Borne by seynen lebetagen vñs hytziger liebe vnd begyr bewegt das lob des almechtigen ewigen gots zu mehren vorgenommen habe do selbst zu Borne in vnser lieben frawen pfarrekirchen vnser merfsburgischen Stiftts Einen altar inn dye ere Sancti Wolffgangi zu erheben vnd zu stifften mit taffeln Mefsgerethe kelche bucher vnd andern gerete darzu gehorig gnuglich vorsehen vnd den mit zweinzick R. guld jerlichs Zcinfis die der genante Clemens Partzsch vor funffhundert R. guld. bei dem Rate zu Borne vff dem Rathhuse gekoufft, begabet vnd dotirt nach vermogen domit habe darzu denne der Erhafttge Er Michael Ditzmann pfarrer zu Zeedlitz funffzig r. gulden gelegt gegeben vnd geeygnet darvmb denne Zwene r. guld. jerliche Zinfse bey dem genantenn Rate zu Borne auch gekoufft zu gemeltes altares besserung So doch das der besitzer gnanten altares wochlichen das jar ober drey messen halten solle vnd solche zweinzick gulden jerliche zcinfse vff dem Rathuse zu Borne zu seiner enthaltung nehmen vnd gebruchen vnd die andern zwene gulden von genanten Ern Michael Ditzeman dar zu gegeben zu der bruderschafft der kalende zu Borne nach abegang vnd tode gemelten Ern Michaels sall kommen vnd volgen lassen vnd uff das solchs vnvorbrechlich gehalten werde So hat der gemelte Clemens Partzsch jus presentandi zu dem genanten altar sancti Wolffgangi dem Erfsamen Rathe zu borne gegeben vnd geeigent des altares gerechtigkeit deste flisiger zu enthalden vnd zu verteidigen vnd eyn Rath zu Borne so vffte sich der altar Scti Wolffgangi vorlediget vnd zu falle komet sollen sie inn vmb gots willen vorleyhen doch nymants anders den eyns burgers sone ader yrer Stadt kinde der ein wertlich prister ist Ader ye also geschicht das er in eynem jare pristerliche wurdigkeit ann sich nemen moge vnd do selbst zu Borne bey dem lehn vnd altare personlich selbst wone vnd residire Es sal auch besietzer gedachten altares dem probst zw Borne pro restauo zehnn gr. jerlichen vff Sanct Michaelis tag gebenn mit dem bescheide wen sich die Zcinfse des altares mit der Zeit bessern wurden das als denn das restaur nach vnserm erkenntnis gebessirt vnd erhohet werde Solche obbemelte ordnung stiftung vnd andacht wie vorberurt vns von wegen des Rats zw Borne vorgetragen haben wir gemelter Tilo von gots gnaden Bischoff zw Merfsburg zw mehrung gots dinst vnd seiner lieben heiligen dangbarlich vorstanden vnd angenommen auch des Rats zw Borne flisig bete angesehen vnd sie der gnediglich erhört vnd haben vñs bischofflicher vnd ordentlicher macht vnd gewalt solche vorgetragene stiftung vnd ordnung des gedachten altares sancti Wolffgangi wie gemelt inn allen vnd itzlichen seynen artikeln puncten vnd stugken oben berurt angenommen zugelassen bestetiget vnd confirmirt Bestetigen zulassen vnd confirmiren das auch also geinwertig in krafft disses briffs die also ewiglich zu blieben vnd vnvorbrechlich zu halten Auch wollen vnd decerniren wir vñs gemelter ordentlicher vnd bischofflicher macht das die vorgemelten Zcinfse vñnd houptsumma die wir ouch hirmitt zw gedachtem altar sanct Wolffgangi voreigenen vnd appropyren hinforder vor vnd vñs wertlicher gewalt gefreyet privilegirt vnd gezcogen sein sollen vnd in der zcall geistlicher guter beschlossen geschätzt vnd gehalten sollen werden Es sollen auch die ihenigen die sich inn zcukunfftigen zceiten vnd tagenn daran vorgreifen vnd vorwirken werden als verstoror vnd zubrecher geistlicher guter wie im rechte vñs gedrugkt vnd geborlich darvmb vnd darvff gestrafft werden Wir behalten vns auch vñs nachkommen die inweysung vnd investitur zu dem obgenanten Altare Wolffgangi so uffte das zu falle komet vnd nodt sein wirdet disse vnser bestetung vnd confirmation wollen wir bey vormeydung des czorn gots vnd

der heiligen patronen vnser Thumpkirchen alhir zw Merfsburgk nemlichen sanctorum johanis Baptiste Laurenty Maximi vnd Romani martirum vnvorbrochlich von yderman gehalten werden vnd haben Vnnd vff das die menschen dister mehr andacht vnd innygkeit zu solcher loblicher stiftung gemelten altaris S. W. haben mogen So geben wir allen vnd itzlichen kristglowbigen rawygen vnd gebichten Menschen so vffte sie zu dem vilgenanten altare etwas geben messe darvff horen vnd yres innys gebete davor thuen vierzig tage aplafss vnd vorgebung vffgelegter busse in vnd mit krafft disses vnser offinbriues . . . gegeben . . . zw Merfsburg . . . tusent funffhundert vnd eynem jaren montages nach artini des heyligen bischoffs vnd beichtigers.

1505.

[53.] Wir Conradus von gots vnnd des heyligenn Romischenn stuls gnadenn apt zew Pegaw dem selbigenn Romischenn stule ane mittel vnnderworffen Bekennen . . . dafs wir dem Ersamenn Greger nether burger zew Bornne als eynem lehentreger. des ersammen Raths doselbist vier huffenn feldes dye do ierlich zewey guthe schock vnnd zewenzigk groschenn zcinsenn dem altar inn vnser pfarkerchenn doselbist durch die flecken seylicher gedechtnifs gestift gelihenn haben, leyhenn im dye selbigen vier huffenn mit allen yren zewgehorungen nutzenn wirdenn freyheytenn gewonheytenn vnnd allenthalbenn So sye von vns vnserm stift zew lehen rurendt vnnd vorige lehentreger benants Raths zew Bornne inn lehenn gehabt mit vnnd in krafft diefss brieffes doch dafs bemelter Radt denn lehenn volge thun solle durch eynn lehentreger so offte das noth vnnd dye zew falle kommenn auff beyder seyt, vnnd also denn, eynenn andernn vor vns ader vnnsere nachkommen vorstellenn solche lehenn zew entpfohenn vnnd dar vonn zew pflegenn das selbig wy inn apt thomas lehennbrieff darvber begriffenn vnnd itzt abermals durch den gestrengenn Ervhesten Gunthern vonn Bunaw dye zceyt amptman zew aldenburgk betetigt inn bey wesen der Erbarinn vnnd vhesten Bastian vonn droschwitz, leonhardt Scheffener gleitzman vnd Cristoff Scharff zew Pegaw official . . . am mitwoch nach Conceptionis virginis marie.

1518.

[54.] Zu wissen als vff einem furstlichen bfelhe des durchleuchtigsten hochgebornen fursten vnnd herrn herrn friderichen des heyligen Romischen reichs churfursten hertzogen zu Sachsen etc. meins gnedigsten herrn die ersamen weissen der radt zu Borna an einem vnd die meinster des Gantzen hantwergs der fleischhauer am andernteil in nachangzeigten gbrechen durch mich Sebastian von kottritzsch Amtmann zu altenburgk auff hewt dato meins furbschidts gnugklich vnd mit allem fleiss kegen einander verhort auch irer bederteil notdorfft vnd gerechtikeit eigentlich angenumen vnd bewogen worden Demnach bekenn ich obgnanter amtman vnd thun kunt mit dissem brieffe das ich sie solicher gbrechen nachvolgender meynung entlich entschieden vnd vertragen habe Nemlich vnd zum Ersten Nachdem gdachte hantwergsmeinster einen furstlichen wille vnd bstetigungsbrieff furgelegt das sie zunfft vnd innung ires hantwergs aldo zu Borne halten vnd haben mogen in maßen sie auch dieselben ghabt vnd noch haben Inn dem aber einem radt seyn ordentlicher gewalt vnnd meinsterschaft nicht verengget etc. darvmb sollen vnd wollen nu fortmehr die hantwergksmeinster des fleischhauerhantwergs zu aller zceit so offt die notdorfft erfordern wurde artiklsweyfse wie sie ires besten vernemens die zcunfft vnd innung ires hantwergs zu haben vermeynt einem Radt zu Borna inn vertzeichnis schriftlich vbergeben, mogen sich auch zu bqumer erinnerung in andern vmbbligenden steten derhalben erholen vnd vntrichts gebrauchen dorauff alsdan ein Radt mit newer vorbetrachtung dem bmelten hantwerge ein redliche Erliche tregliche innung vffrichten geben vorschreiben und bstetigen sollen Jdoch das gemeiner nutz nehst der gotes ere bdacht auch das keine sach ader vorwirkung die dem ordenlichen richterlichen gwalt zugehörig, sie weren clein oder gros inn irer zcunfft vnnter sich selbst nicht zu straffen fleissigklich vorhutet vnd das inn alle wege mit gnanten worten im zcunfftbrieffe dieselben zu andern vffzuheben etc. einem

radt vorbehalten werden solle Auch sol in eynem igklichen zeunfftbrieff clerlich einverleibt vnd furthyn dem fleischhawerhantwerge als ein redliche vbung zugelassen seyn wo eins fleischhauers oder sunst eins borgers sone aldoselbst zu Borna ein lediger vnbeweibter geselle were vnd das fleischhawerhantwerg nach seiner weyse redlich bekumert ader erlernet hett dasselbig treiben halden vnd gbrauchen wolde das ime solchs vngewegert vorstattet vnd gleich andern meistern frey vnd offen seyn soll mit difser bscheidenheit das derselbig vnbeweibt ledig fleischhawer meinster sich ersamliche vnd borgerlicher zeucht on beruchtigte vnd verdecktliche weibs bild vnd andre leichtvertige handlung vnd sunsten nach inhalt der hantwergszcunfft ghorsamlich halden vnd ertzeigen solle worde er aber derhalben einicherlei verdecktliche orsachen oder argkwenigkeit vermerkt so sol zu etlichen mahlen derselbig vnbeweibte fleischhauer der vordecktlichen orsachen sich zu entwessern vnd abtzustellen verwarnt vnd ermahnt werden wo aber solchs vnhulfflich sein wurde Alsdan sollen vnd mogen die meistern des hantwergs in gmein bey einem radt vnd den gerichtten zu Borna vmb ordentlich zuthun vnd einsehung dorinnen die billikeit vnd rechtvertigung auch gborliche straff zu ergehen lassen nachdem die vorprechung in irer art vorfallen wirdt ansuchung thun Ob es auch von einem radt oder den gerichtten zu Borna wie gehort gburlicher weise nicht ghanthabt volnstragkt oder auch gstrafft vnd die fleischhauer dieselbigen nachlessigkeit glaublich bekunden worden so mogen sie als dan an die furstliche obrikeit ire notdorfft vnverhindert gelangen lassen vnd hirmit sollen die obgnanten partheyen aller andren hiraufls entstandnen gbrechen woran die sein nichts ausgeschlossen gantzlich vnd gar versonet vnd gutlichen vereynt sein vnd pleiben Auch zcerung vnd scheden was der sich hirbey begeben zugleich vffghoben todt vnd abe sein Zu warer orkundt vnd stetter vnvorbrochlicher haldung difsen vertragk gleichs lauts gezwifachter vntter mein amtmans angeboren Erbinsigil hiran gegangen wissentlich besigelt jedem teil zu seinem ersuchen einen gegeben vnd gescheen zu Altenborgk . . . am dinstag nach des heyligen bonifacius tage.

1532. Siegel gut erhalten.

[55.] Von gots gnaden Wir Johans hertzog zu Sachssen . . . Bekennen . . . Nachdem sich zwyschen vnserm Amt vnd stadt Born der gericht halben irrung zugetragen Als haben wir dieselben gericht durch vnserer Reth . . . Gunthern von Bunau Ritter . . . ambtman zu Aldenburgk vnd Heinrichen vom Eynsiedel zum Gnanstein in beywesen vnseres gleitsmans daselbst vnd des Raths vnterscheiden vnd verlachsteynen lassen . . . Vnnd erstlich ist ein steyn gesetzt wurden vnter der holtz Muhlen dem Rath zustendig an dem fliess der wyra vff den vfer vom selbigen steyn an bis wider an den andern steyn vff den tham gesatz / welcher tham zwyschen dem Stadtgraben, vnd des Raths teych gelegen ist / als dan den selbigen tham, mit eingezogen, bis auf den dritten steyn / auf dem selbigen tham / am orte des teychs gesatz Vnd furder auf den vierdten steyn / auf den eyssern schut vnd vff den selbigen schut hinfur, bis vff den funfften steyn, am ort desselbigen schuts gesatz, als dan vff den sechsten steyn, welcher vnten am czaun / an Melhorns Garten gesatz ist, weytter von demselbigen steyn am czaun / hinauff bis an siebenden steyn, forder von dannen am czaun des gemelten gartens, hinymb, bis an den achten steyn aber an czaun, an Melhorns garten, bey des heyligen creutzs capell gesatz, alsdan weytter ihensit der capelln, vber die strafs, bis an den neunenden stein, an des Stadtschreibers haus eingegraben, forder von des Stadtschreibers haus an, aufwendig den heufsern vnd wenden / bis an des burgermeisters scheune, vnd von dannen aber, an derselbigen scheun heufsern wenden vnd. tzeunen, hinymb bis an czehnden stein gesatz, von dannen vber den steynwegk, bis an eylfften stein gesatz, an wolf dhürings hauß, von dannen aber weytter an heufsern zceunen vnd wenden hinymb bis an die ander ecke, an Mathes kilians haus, vnd an zceunen hinymb, weytter bis an zwelfften steyn, von dannen aber an zceunen vnd heusern hinymb bis an dreitzehnden stein, welcher an dem Mülgraben, nahent an tzaun gesatz ist, Alsdan weytter am mülgraben hinab bis an den hawbtflus der wyra, vnd alsdan weytter hinab am vfer der wira, bis wider an den ersten stein obengemelt, doselbst vnter der

holtzmühl gesetzt, an vfern des Mülgrabens, vnd wassers anzufahren, vnnd was in dieser reflex allenthalbenn gegen der Stadt werts gelegen, dorvff sollen der Rath zu Born, die ober vnd nidergericht haben / lauts vorlafsbriefs, weyter ist ynen ir schenckhaus vnd keller vnd der plahn dorfur, so weyt der zwischen dem keller scheunen heusern gerten vnd gesetzten steynen begriffen, item die zwey heuser eyns des gemeynen hirten, das ander eins burgers sambt den gerten, so darbey in derselbigen reflex, vortzewnt vnd eingezogen, auch eingereumbt, wie dan zu derselbigen sonderlichen bereynung, allenthalben acht mahlsteine gesetzt seynt, Der plahn so scheun keller vnd schenckhaus vber gelegen, sal mit plancken nit vormacht werden... Geschehen zu Torgau Sonnabents nach Margarete [1532]

1537.

[56.] Wir Simon von got vnd des hayligen Romischen stuels gnade Abbt, Melchiar Becherer prior, Leonhardus Zzeicher procurator vnnd gantze samplung des Closters pegaw, Bekennen Nach dem bmelt vnser Closter ayn holtz hat die Ebtey gnant sampt eynem Teichlein dor vnter bey Porne vnd Bogkwitzer margk gelegen, welch holtz dem Closter zu nachtayl mit triefften huetungen vnd anderem in diesen fswinden leufften gentslichen vorwustet, also wu das closter solch holtz lenger behaltten, das es dasselbige nit hette gnissen noch vortedigen mugen, wie es dan viel jar muß verschont werden, eher es widervmb zw ordentlichem gehauicht gebracht Als haben wir mit geburlichen vorgehenden tractaten, auch mit vorwissen Rat vnd gnediger bewilligung des durchlauchtigen hochgebornen fursten vnd herren hern Georgen hertzogen zu Sachsen etc. / vnser gnedigen Landisfursten, solch holtz sampt anhangendem Teichlein, dem gestrengen vnd hochgelarten hern Georgen von Braytenbach doctori vnnd ordinario auch seyner lehenserben erblichen mit aller gerechtikayt wie solchs alles vnserm Closter zugestanden vorkaufft / vnd vorkauffen im dasselbige hiemit in krafft dieses briefs vor acht hundert gulden muntz die er auf folgende tag zceyt soll zcalen, nemlich, auf negstkunfftig walpurgis zway hundert gulden, vnd allewege auf folgende walpurgis zway hundert gulden bis die acht hundert gulden zcalt, welche Zcalung auf aynen jeden termyn in des Closters kasten zu Leiptzigk aufslofs eingelegt werden sal Wir gereden auch vnd geloben gnantem doctori Braytenbach vnd seyner lehens Erben dieses kaufs eine rechte gewer zusein, vnd haben im vnd seyner leibslehens Erben hirauf solch holtz vnd teichlein zu rechtem manlehen gelihen vnd auf seyne bitt samptlich mit im seyner vettern also vnd der gestalt / wan doctor Braytenbach vnd seyner leibs lehens Erben vorsterben vnd kayne leibslehenserben hinter sich vorlassen wurden, das alsdan seyner vettern Hanfs, Jheronimus, Jordan vnd Christoff zu Crostewitz vnd ire leibslehenserben, solich guter haben vnd besitzen sollen, wan der auch nit meher, als dan sollen solch holtz vnd teichlein auf Otten zu Zcossen vnd Wolffen von Braytenbach zu pelen vnd derselbigen leibslehenserben, kommen vnd fallen / die dan den lehenen so offte die zu falle kommen volge thuen vnd dorgegen nicht meher dan aynen halben gulden vor den lehen brieff geben sollen alles getrawlich vnd one geferde . . . gescheen am freytag nach Luce [1537].

1541.

[57.] Ich Bartolmes vonn Draschwitz zu wideraw Bekenne . . . das ich . . . denn ersamen vnnd weisenn Burgermeister . . . der stadt Bornn den steinbruch zw froburgk gelegenn, inn meyn . . . lehenn gut doselbst gehorigk . . . ynn massen sy denselbenn von vnserm lybenn vatern, wendeln vonn Draschwitz . . . vnd seinen vorfharenn ynn besitz vnnd gerucklicher gewher ane alle Einrede vnnd vorhinderunge lange vorjarunge gebraucht habenn, hirmit gegenwerttlich würrklich thetlich mit hand vnd munde wy geburlich gelyhenn habe, leyhe ynenn denen hyemit . . . Dobey vnnd nebenn seind gewest die . . . hermann vonn Newstadt, Ewstachius vonn Draschwitz, Görg vonn kitzscher, defsgleichen . . . mertenn örtel gleitzmann, Barttol schrey burgermeister, Blasius möller nickel rülingk vnd Gorge hilbrandt beysitzer des rats . . . [1541] donerstags noch quasimodogeniti.

1553.

3 Siegel erhalten.

[58.] So unnd als, Inn vorgangner Zeit, die Stadt Bornna, sonderlich aber der Radt doselbst, Inn grossenn Schuldenn gesteckt, vnnd seer arm gewesenn, welchs anfencklich ane Zweifel, aus fewers not her geflussenn, vnnd doch gleichwol vor etlichenn sechtzig jarenn, vmb verhuttung willenn Zancks, vnnd Stieftung guttes nackbarlichenn fridenns, das Schlofs gut denenn von der Jann, vmb etliche Taufsennt gulden, erblichenn ab erkaufft, vnnd mit barem gelde bezallet, Welche kauff Summa der Radt vnnd Stadt, durch aus vmb ein grosenn Zins erborgenn mussenn, aldieweil kein vorradt vorhandenn gewesenn, vnnd sich also nach tieffer, allein wie gmelt vmb fridens willen, vnd inn kunfftigen jaren zu Mherung vnd aufbringung gemeiner Stadt Nutzes vnd fromenns, verteuffet, Doher mann die geschos inn der Stadt, auff denn heusern, vnnd gemeinen pfolburgern Erhehenn hat mussenn, sich vonn jar zu jarenn, aus solcher schuldenn last zuwirckenn, Wie dann Gott habe imer lob, Nun zur Zeit vhost gescheenn ist, Domit aber Nun die Einwhoner gemeltenn Stad Bornna, der beschwerlichenn last der auflage vnd erhebung des Schofses, widervmb erlediget, vnnd also der erlangtenn gutter, dadurch gnisslichenn vermercken mochtenn, Als haben demnach heut dato Burgermeistere vnnd Radtmanne inn allenn dreien Rethenn, Desgleichenn die viertelmeistere sonnst heuptleute gnant, Auch die Eldestenn, vnnd die gantze Gemein Einhelllichenn vnnd gantz gleichstimick, geschlossenn vnnd gewilliget, Inmassenn es hie mit geschlossenn vnnd gewilliget sein soll, Dafs Nun hinfuro einem igklichenn haufse inn der Rinckmaur gelegenn, auch Einem iglichenn pfolburger inn der Stadt (dann die Jenigenn so aufserhalbenn der Rinckmaur heuser haben, sollenn mit dieser einigung vnnd wilkorchlichenn bewilligung, nicht gemeinet sein.) die geschofs jerlichenn die helfft fallen schwindenn, vnnd erlassenn sein sollenn, Nemlichenn, wan einer vonn seinem hause auff einen termin zweintzig groschenn het geben mussen, Das er nun nicht mehr dann zehenn groschenn gebenn darff, vnnd nachdeme ein pfolburger hievornn auff einen Termin, sechs groschenn, halb zu marcktrecht vnnd halb zu geschos gerechennt, hat gegeben, das er nun hinfuro auff igklichenn termin, nicht mer dann drey groschenn, die helfft zu marck recht vnnd die ander helfft zu geschos gerechennt, gebenn soll, Desgleichenn auch das hirvber einem yglichen haufse, klein, vnd gros, die vier groschenn jerlichs wachgeldes, erlassenn sein sollenn, Doch mit dieser eigentlichenn Condiicion, punct, vnnd vnderscheidt, vnd diesem gewilligtem vorbehalte, So der Radt oder die stad Bornna, inn newlicher weile oder zukunfftigenn Zeitenn, wann auch das geschege, (welchs doch der almechtige gott, gantz gnedigklich aus milder gute vnnd Barmhertzigkeit, vorhuten vnnd vorkomenn wolle) widervmb inn not, armut vnnd vnvermogennd komen wurde, es geschech durch fewers not, krick, oder andere beschwerliche zufelle, oder auch wan es ein landesfurste nicht leidenn wolte, das alsdann, ein Erbar Radt macht habenn soll, one idermennigklichs einrede, behelff, oder einige wegerung, Solche geschofs, vnd wechtergeldt, alles, oder zum teyll, ires gefallenns, widervmb zu erhehern vnd aufzusteigern, Vnnd sollenn solche geschosse Nun furthin, allewege inwendigk acht tagen die negsten nach walpurgis vnd innerhalb acht tagem nach michaelis bei bufs funff groschenn, vnnachlefslich entrichtet, vberreicht, vnnd bezalt werdenn, Vnnd nach deme man bishero von einem frembden menschen, so burger alhier werdenn wollenn, nicht mehr dann zehenn groschenn zw Burgerrecht genomen, so soll nun hinfuro, weil diese minderung der geschofs stehet Eyn ygklicher so burger alhier inn der Stadt sein, oder sein handwerck vnd handtirung treibenn will, drithalbenn gulden, vnnd ein burgerskindt, so in der Stadt geborenn, oder sonnst sein Elternn das Burgerrecht zuvornn habenn, ein halbenn gulden zw Burgerrecht, vnnachlefslich gebenn vnnd alsbalde entrichtenn, Vnd sol gleichwol der brauch vor dem Jargeding wie der vonn alters eingefurt, vngeschwecht bleibenn, Auch was man vorhin zu meisterrecht vom handwerg, wann einer das erlanget hat, dem Radt gegeben, soll hiedurch nicht gemindert sein, vnd soll ime ein ider eine wheer, Es sey ein Spiels, helbart, oder Buchsse, schickenn, welche dann sein eigenn bleiben soll, doch soll ein ider was zur krigsrustung gehort auff seinem

haufse dasselbe inn veränderung bleibenn lassenn, so soll dem Stadtschreiber der grosche vom eide fur zustabenn, vnd dem knechte sein gebur auch entrichtet werdenn, Vnd seynt hiebey gewessenn, alle drey rethe, Als George Hilbrand Burgermeister, Bartel schrei vnd pawel mende Burgermeistere, Blasius muller, peter Hilbrand Richtere, Mats schlichter, peter breittnigk, George pöhl, Blasius melhornn, Veit sparwalt, Hans wildenhain, wolff wenicker, Hans kribitzsch, peter Lofs, Bartel Haese, Clemen heinick, Hans helregell, vnnnd Bastian Haubelt, Radtspersonen, Darnach bastian Khun, Simonn haubelt, Michel Schlichter, vnnnd Valtenn heyne vierteilsmeistere, sonnst heuptleute gnant, Auch die Eldesten Marcus wildenhain, Thomas jann, hans wagner, veit scheibe, hans breittnig, gregor netter, Bartel Churt, wolff mende, Max vltzsch, Jacob Steltzener, Wentzell biberstein, Asmus rulick, michel muller, Vnd danebenn die gantze gemeyn, Das aber solchs alles, vnnnd ides, sampt geschenen auszogenn vnnnd furbehaltungen, Stet vnd vhest gehaldenn werdenn soll, hat ein erbar Radt das Stadsecret, fur sich vnnnd ire nachkomen an diesenn brieff hengen lassenn, So haben sich Valtenn heine vnd Simon haubelt, als vierteilsmeistere (weil die andern Zweene das schreiben nicht gelernnet) vor sich vnd der gemein wegenn, doch auff der gemein furgehende bitt, mit iren eigen henden vnderscriebenn, vnd ire gewenliche petzschafft an diesenn brieff auch hengen lassenn, Welchs alles ich Bernhart franck, der Zeit geschwornor Stadtschreiber, das es also gescheen, mit diesem brieff krefftiglichen bekenne, welchenn ich auff beuelch dreier rethe, der vierteilsmeistere, vnnnd der gemein, mit meiner eigen hand inn diese formabracht, vnd geschrieben habe, Gescheen vnnnd gegeben freitags nach Misericordias domini Anno post Christum natum funffzehen hundert drei vnd funffezigk, denn Ein vnd Zweinzigsten tagk des Monadts Apprillis vnd ich valtten heyniman habe mich also myt meynen eygen hand vnderschyben. Des gleichenn ich Simon haubeltt mit meiner handt auch gethann.

Nach jetziger Datierung sind die Urkunden an folgenden Tagen ausgestellt:

1. ohne Datum.	20. Sonntag 8. V.	39. Freitag 13. XI.
2. Montag 24. VIII.	21. } ohne Datum.	40. Montag 4. II.
3. Freitag 11. VII.	22. }	41. Freitag 27. XI.
4. Montag 11. XI.	23. }	42. Sonnabend 14. II.
5. Freitag 6. I.	24. }	43. } Dienstag 9. XI.
6. Sonnabend 8. XI.	25. Montag 26. II.	44. }
7. } Sonnabend 13. I.	26. Freitag 5. XII.	45. Montag 7. V.
8. }	27. ohne Datum.	46. Montag 30. IX.
9. Mittwoch 13. XI.	28. Montag 5. XII.	47. Donnerstag 25. IV.
10. Freitag 5. I.	29. Montag 29. VII.	48. Dienstag 19. III.
11. Montag 21. XII. *)	30. ohne Datum.	49. Sonntag 28. XII.
12. Mittwoch 23. IX.	31. Freitag 19. VIII.	50. } Mittwoch 18. XI.
13. Donnerstag 7. IV.	32. Sonntag 1. VII.	51. }
14. Mittwoch 2. V.	33. Freitag 14. XII.	52. Montag 15. XI.
15. Freitag 21. II.	34. Sonnabend 19. VIII.	53. Mittwoch 10. XII.
16. Sonnabend 21. II.	35. Dienstag 13. X.	54. Dienstag 8. VI.
17. Montag 31. V.	36. Sonnabend 6. II.	55. Sonnabend 13. VII.
18. Mittwoch 14. IV.	37. Montag 14. I.	56. Freitag 19. X.
19. Mittwoch 7. XII.	38. Dienstag 16. VII.	57. Donnerstag 21. IV.

*) Diese Urkunde gehört nicht, wie oben irrthümlich angesetzt, in das Jahr 1430, sondern 1450, da nur in letzterem Jahre der Wochentag stimmt.

